

**D<sup>a</sup> ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O DÍA 25 DE NOVIEMBRE DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

**ACTA DA SESIÓN ORDINARIA LEVADA A CABO POLO PLENO DO CONCELLO O DÍA 25 DE NOVIEMBRE DE 2010.-**

No Salón de Sesións da Casa do Concello de Ames, ás vinte horas e trinta minutos (20.30) do xoves 25 de novembro de 2010, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

<b>Grupo municipal socialista</b>	<b>Grupo municipal Popular</b>	<b>Grupo municipal do BNG</b>
Patricia Conde Lois Carmen Fraga Crespo M <sup>a</sup> Isabel González Cancela Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro M <sup>a</sup> Dolores Fernández Álvarez Ramón García Argibay Emilio Martínez Carballeira Bernardo Moar Míguez Alfonso Rey López Ana Ruso Valiña	Olalla Alvite del Río José Ramón Arufe Vidal Xosé M. Fernández López Vitor Vicente Díaz Mercedes Vidal Baamonde

Non asiste pero xustifica a súa ausencia o concelleiro do grupo municipal socialista don José Manuel Miñones Conde.

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona Rosa-Ana Prada Queipo.

Intervén o señor alcalde don **Carlos A. Fernández Castro** para dicir que como hoxe é o día internacional da violencia de xénero propón gardar un minuto de silencio ó inicio desta sesión plenaria en recordo das 64 mulleres e dos 4 nenos e nenas vítimas de malos tratos e que están a disposición de todos os presentes que as desexen utilizar unhas tarxetas vermellas. Toda a corporación posta en pe e portando as tarxetas vermellas garda 1 minuto de silencio.

**A) PARA DAR CONTA:**

**Punto Primeiro.- Dar conta dos decretos ditados pola Alcaldía dende a última sesión plenaria ordinaria.**

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que dende o decreto de convocatoria da anterior sesión plenaria ordinaria ate a convocatoria da presente sesión ditáronse un total de 151 decretos, dende o 1247 ata o 1398.

**B) PARA DELIBERACIÓN E ACORDO:**

**Punto Segundo.- Aprobación inicial da modificación da ordenanza reguladora do servizo de axuda no fogar.**

Intervén o señor alcalde don **Carlos Antonio Fernández Castro** que lle concede a palabra a concelleira de benestar social e igualdade, dona **Isabel González Cancela** que di: Boas noites a todas e a todos, como ben dixeran na Comisión Informativa, estas correccións da ordenanza veñen dadas a petición da Xunta de Galicia. A verdade é que son modificacións mais ben de tipo formal, que non afectan ó que é o servizo. A Xunta xa nos informou que estaban ben recollidas as modificacións introducidas

Toma a palabra á concelleira do grupo municipal do BNG, dona **Mercedes Vidal Baamonde** que substancialmente di: Boas tardes – noites a todos e a todas, eu non estiven na Comisión, lin a acta, e hoxe revisando a documentación e a vista deste documento que se nos fixo chegar onde a Xunta nos requiría aportar documentación por un lado e por outro modificar algúns puntos do noso regulamento, entroume a dúbida de que pasos dera o Concello. Hoxe, a última hora da mañá chegou un informe pero voto de menos que xa que se explican unha serie de cousas, que tamén se explique, porque se pon o límite dos 42 puntos para ter acceso as prestacións. Por outro lado, quería mencionar, que cando discutimos este regulamento, alá por xullo do 2009, o BNG xa fixo referencia a que tiña as súas dúbidas de que puidera denegárselle o servizo ou quedar na lista de agarda, persoas que tiñan concedida e recoñecida dependencia, agora os servizos de inspección dánnos a razón. Para rematar algo que creo que é un erro de transcripción, na proposta, no artigo 20 no punto 1 di: “A realización de actividades domésticas que fosen incluídas”, eu creo que é “que non fosen incluídas”.

Toma a palabra ao concelleiro do grupo municipal popular don **Bernardo Moar Míguez** que substancialmente di: A única dúbida que nos quedaba era o tema que dixo a compañeira do BNG, o tema da baremación dos 42 puntos, o resto das dúbidas xa as comentamos na Comisión e quedaron clarexadas. Anuncio o voto afirmativo do meu grupo municipal.

Toma a palabra á concelleira de benestar social e igualdade, dona **Isabel González Cancela** que substancialmente di: Respecto a puntuación mínima, na ordenanza había outro tipo de baremos pero non tiñamos unha puntuación mínima. Pero a Xunta, nos di que temos que poñer un mínimo, e o que fixemos foi coller todos os expedientes que temos e facer unha media, é dicir, ninguén vai quedar sen servizo, todas aquelas persoas que teñan necesidade van a cumprir os 42 puntos.

Rematadas as intervencións o pleno da corporación por unanimidade dos membros presentes, adopta os seguintes acordos:

**Primeiro.-** Prestar aprobación inicial á modificación da ordenanza reguladora do servizo de axuda no fogar do concello de Ames. O contido a modificación queda recollido no anexo I deste acordo.

**Segundo.-** Someter á aprobación inicial desta modificación á exposición pública polo prazo de 30 días hábiles mediante anuncio no Boletín Oficial da Provincia, páxina web municipal e taboleiro de anuncios.

**Terceiro.-** Para o suposto de non presentarse reclamacións durante o prazo de exposición pública a aprobación inicial quedará elevada a definitiva de forma automática.

#### Anexo I

*Corrixir o artigo Artigo 12.d) quedando da seguinte forma:*

*“1. Unha vez completados os expedientes o/a traballador/a social dos servizos sociais comunitarios básicos comprobará as circunstancias sociais do/a solicitante. Este técnico encargarse de emitir o correspondente informe social de valoración onde se detallará a proposta que será valorada na Comisión Técnica correspondente.*

2. Esta Comisión, que deberá estar composta polo menos polos seguintes membros: 1 traballador/a social responsable do SAF municipal, 1 traballador/a social dos servizos sociais comunitarios básicos e o/a concelleiro/a responsable do Benestar Social e Igualdade, visto o informe e demais documentación, elevará unha proposta ó órgano competente que será preceptiva e vinculante e, determinará a idoneidade do servizo así coma a intensidade e tarefas recomendables para cada caso concreto.”

Artigo 12.5.)

“ O acceso ó servizo será directo para persoas que , tendo recoñecida situación de dependencia, se lles asigne a axuda no fogar na correspondente resolución de programa individual de atención, consonte ó establecido na normativa vixente, non podendo incorporar ó servizo maior número de altas que as que permita atender a dispoñibilidade orzamentaria.”

Artigo 14.1)

“Modalidade de acceso directo: o servizo realizarase atendendo ó disposto na resolución do programa individual de atención do sistema galego de atención á dependencia, non incorporando ó servizo maior número de altas que as que permita atender a dispoñibilidade orzamentaria.”

Artigo 18.1)

“Na modalidade de acceso directo, é dicir para as persoas que teñan recoñecida a situación de dependencia, atenderase ó establecido na correspondente resolución de programa individual de atención, sendo a aplicación horaria do mesmo flexible e conforme co proxecto de intervención, de xeito que, cando menos, se garanta a cobertura das necesidades de atención de carácter persoal tódolos días de semana.”

Artigo 20

“Exclusión da prestación do servizo

En ningún caso poderán formar parte das actuacións desenvolvidas polo servizo:

1. A realización de actividades domésticas que non fosen incluídas no proxecto de intervención e no acordo de servizo recollidos nesta ordenanza reguladora.
2. Actuacións que polo seu carácter sanitario deban, en todo caso, ser realizadas por persoal facultativo.”

Disposición adicional cuarta corrixindo “o libro de reclamacións estará a disposición das persoas nas respectivas unidades de traballo social con sede en Bertamiráns e no Milladoiro, sendo...” e quedando da seguinte forma “ o libro de reclamacións estará a disposición das persoas na Secretaría Municipal do Concello de Ames, emprazada na Casa do Concello en Bertamiráns.”

Despois da Disposición final e xusto entre o baremo para determinar a asignación do servizo de axuda no fogar e o factor 1, debería recollerse o seguinte:

“Para acceder á prestación do servizo de axuda municipal de axuda no fogar, será preciso acadar a puntuación mínima de 42 puntos dos seguintes factores”.

**Punto Terceiro.- Proposta Plan de Obras e Servizos 2011 (POS 2011).**

O alcalde don **Carlos Antonio Fernández Castro** concede a palabra ó concelleiro de infraestruturas e obras, servizos básicos, parques e xardíns don **Gustavo Nieto Santiago** que substancialmente di: Boas noites a todos e a todas, trátase do plan de obras e servizos da Deputación do ano 2011, coñecido como POS, este ano de algo máis de 474 mil euros, se podía utilizar na súa totalidade para obras ou o 50% para gasto corrente. Este ano este goberno decidiu que o 50% do presuposto se ía incluír en gasto corrente e o outro 50% íase meter en obras. A proposta do goberno, son

tres obras no plan principal e unha obra máis no plan complementario. As tres obras que irían no plan principal serían “Saneamento e abastecemento e anulación da fosa séptica en Guimaráns”, son mais ou menos unhas 8 casas que hai na zona de Guimaráns que están unhas sen abastecemento e outras sen saneamento e abastecemento, e aparte anularíamos unha fosa séptica que hai nunha zona que lle da bastantes problemas de mantemento ao concello. A segunda obra sería “Ampliación de saneamento en Tarrío”, que sería continuación do saneamento que está feito cando se fixo a travesía desta zona, e sería un adianto para dotar de servizos a zona para cando logo se poida completar a travesía de Tarrío, e a terceira obra sería “O asfaltado da estrada que vai dende Ponte Maceira (dende a Ponte Vella) ata Susavila de Carballo”, unha estrada que está bastante danada, alí houbo moitas obras de rede de sumidoiros durante estes últimos meses ou estes últimos anos, e está bastante dañada. E por último a obra que iría no plan complementario é “Ampliación do saneamento de Ponte Loureiros en Covas”, recolleríamos unhas cinco ou seis casas que están agora mesmo sen este servizo. Coma sempre dicimos cando traemos o POS todas son obras importantes, historicamente traemos saneamentos e abastecementos porque son servizos hoxe en día creo que imprescindibles e moi necesarios para os nosos veciños.

Toma a palabra o voceiro do grupo municipal do BNG don **Xosé Manuel Fernández López** que substancialmente di: Boas noites a todos os presentes. Empezando como rematou Gustavo, todas as obras son necesarias e máis que houbera que se puideran facer. O POS é un plan claramente inversionista, e ten como obxectivo fundamental dotar de equipamentos públicos e facer pequenas obras. Esa é a súa filosofía e con esa filosofía se foi executando durante todos estes anos, fundamentalmente en saneamentos, abastecementos, algún camiño, algún campo da festa tamén, me parece que fora en Biduído, todas obras de equipamento. Xa o ano pasado no 2010 e este ano, no 2011 a convocatoria admite a posibilidade de utilizar o 50% para gasto corrente, gasto corrente dos servizos públicos, e o goberno municipal lexitimamente, decidiu utilizar o 50% deste POS, 237.000 euros para gasto corrente.

Eu creo que este ano baixa un pouco, hai que ser consciente, supoño que o goberno é consciente deste asunto, polo tanto o investimento en obra con respecto o ano pasado baixa o 50%, se ademais temos en conta que, polo momento non hai noticia de ningún plan E, nin ningún plan nin do Estado nin da Xunta que intente paliar a situación deficitaria dos concellos en obras, e tendo en conta, que neste ano, como no ano pasado, as grandes obras executáronse precisamente con estes plans e os recursos dispoñibles do concello para obras, cada ano son máis reducidos, a capacidade de investimento redúcese un pouquiño máis, pero bueno en todo caso é unha opción que escolleu o goberno.

En canto as obras propostas, unha é unha estrada, arranxo dunha estrada, dicir ao respecto da estrada que aínda estiven hoxe por alí visitandoa, necesita arranxo, igual que outras estradas que hai polo Concello, esta un pouquiño máis quizás, pero bueno, hai máis, hai outras estradas que tamén non lles viña mal un rego asfáltico, pero o que me interesaba destacar a min é, que en Carballo, na aldea de Carballo hai catro ou cinco casas que están baixando a marxe esquerda, que están pendentes de conectar aos pozos de saneamento, conectar o servizo de saneamento, esas casas para conectar os pozos de saneamento van ter que facer cruces pola estrada, porque os pozos están do outro lado, están baixando a dereita, por tanto aí necesariamente en algún momento se van ter que facer, cando menos, tres cruces, eu creo que sería moi conveniente, porque ademais a obra non é moi grande, deixar feitos eses cruces xa, para que despois cando se asfalte non se deteriore. Tamén recordar que seguen pendentes as execucións de dous saneamentos en Carballo e Portanxil, que eran saneamentos que foron comprometidos e adxudicados pola Xunta de Galicia anterior, bipartita BNG – PSOE, que foron anulados pola actual Xunta do

PP, pero é evidente, é necesario executalos, ante as dúbidas que teño de que a actual Xunta teña vontade real de executar este dous saneamentos, propóñolle ao goberno municipal que os teña en conta para o Plan de Obras Municipais do ano 2011.

Toma a palabra o concelleiro do grupo municipal popular don **Ramón García Argibay** que substancialmente di: Boas noites, como xa se dixo, este plan se trata tódolos anos por estas datas, e nesta ocasión o 50% vai a parar a gasto corrente, é unha técnica que está agora mesmo funcionando nos concellos e este concello se acolleu a ela. En canto as obras, algunha vez se falou de que se poderían consensuar estas obras entre os grupos políticos, ata de agora non se fixo, é unha pena. Estamos de acordo en que todas as obras son necesarias, teríamos que discutir probablemente entre os grupos políticos cales son as prioridades, e para saber cales son as prioridades nada mellor que reunirse e ver punto por punto, parroquia por parroquia, e aldea por aldea, en canto o resto pouco máis hai que dicir, é certo que na situación económica actual, ese 50% de gasto corrente pode ser unha axuda, evidentemente é unha axuda, o que está claro é que non vai solucionar, por desgraza, en maior medida a situación que atravesan os concellos. De momento nada máis, grazas.

Intervén o concelleiro de infraestruturas e obras, servizos básicos, parques e xardíns don **Gustavo Nieto Santiago** que substancialmente di: Dicar a Xosé que os cruces de Carballo terémolos en conta, iremos a comprobar cantos cruces son necesarios. En canto a Carballo e máis Portanxil, este proxecto que está entregado na Xunta, estamos á espera da decisión final e a partir da decisión que tome a Xunta de Galicia, actuaremos facendo a obra dende o concello ou pelexando con ela dende a Xunta. En canto ó gasto corrente é decisión do goberno incluír gasto corrente no 50% deste presuposto, igual que fan moitos concellos de tódolos cores.

Rematadas as intervencións o pleno da corporación por maioría simple, cos votos a favor dos 8 membros presentes do grupo municipal socialista e a abstención dos 7 membros do grupo municipal popular e os 5 membros do grupo municipal do BNG, adopta os seguintes acordos:

**Primeiro.-** Aprobar o Plan Provincial de Cooperación ás obras e servizos de competencia municipal (POS) 2011, cuxas bases se coñecen e aceptan na súa totalidade, no que se recollen as obras que o Concello ten previsto realizar, e a dedicación a gastos correntes do exercicio 2011, e de acordo co financiamento que se indica:

a) Realización de obras:

Denominación da obra	Estado + Deputación	Concello	Presuposto total
Saneamento, abastecemento e anulación de fosa septica en Guimaráns (Bugallido)	120619,25	8650,74	129269,99
Ampliación saneamento e abastecemento en Tarrío	88230,38	6327,83	94558,21
Pavimentación camiño Pontemaceira-Trasmonte-Carballo	28504,64	2045,28	30549,92
<b>SUBTOTAL OBRAS</b>	<b>237354,27</b>	<b>17023,85</b>	<b>254378,12</b>

Aprobar os proxectos das obras incluídas na anualidade 2011 e que se relacionan nesta táboa.

b) Financiamento de gastos correntes:

<b>Achega provincial aplicada ao financiamento de gastos correntes</b>	237.354,26.- €
--	----------------

c) Resumo:

<b>Subtotal obras</b>	<b>Estado + Deputación</b>	<b>Concello</b>	<b>Presuposto total</b>
SUBTOTAL OBRAS	237.354,27.-	17023,85	254.378,12.-
SUBTOTAL GASTOS CORRENTES	237.354,26.-	4.747.881,65.-	4.985.235,91.-
TOTAL	474708,53	4764905,5	5239614,03

**Segundo.-** Aprobar o Plan complementario do ano 2011 no que se inclúen as obras que a continuación se indican e aprobar os correspondentes proxectos:

<b>Denominación da obra</b>	<b>Presuposto</b>
Ampliación saneamento en Ponte Loureiros (Cobas)	61399,65
TOTAIS	61399,65

**Terceiro.-** Declarar que o Concello é titular e ten a dispoñibilidade dos terreos, augas e servidumes para a execución das obras, e que ten resolto o relacionado coas concesións e autorizacións administrativas que legalmente sexan necesarias.

**Cuarto.-** Comprometerse o Concello a incluír no orzamento municipal do 2011 os fondos necesarios para facer fronte á achega municipal das obras incluídas na anualidade do 2011.

**Quinto.-** Solicitar da Deputación Provincial da Coruña, a delegación neste Concello da contratación e execución das obras incluídas no plan, que se entenderá aceptada si esta prodúcese definitivamente.

**Sexto.-** Declarar que o Concello non solicitou nin percibiu ningunha subvención doutras administracións públicas para o financiamento do investimento.

**Sétimo.-** Autorízase á Deputación a obter as certificacións da Axencia Estatal de Administración Tributaria e da Tesourería da Seguridade Social nas que se acredite que o Concello está ao corrente nas súas obrigas tributarias e coa Seguridade Social.

**Oitavo.-** Facultar expresamente ao alcalde para todo o relacionado coa tramitación e xestión do presente acordo e o correspondente expediente.

**Punto Cuarto.- Desafectación parcela para construción escola de educación infantil en Bertamiráns.**

Intervén o señor alcalde don **Carlos Antonio Fernández Castro** para dicir substancialmente que existe unha solicitude por parte do Consorcio Galego do Servizo de Igualdade e do Benestar, baseada nun acordo plenario de data 25 de febreiro de 2010, que se titulaba inicio de expediente para posta a disposición de parcela na localidade de Bertamiráns para escola de educación infantil. Toda vez que ese acordo fora notificado ao Consorcio, aínda que posteriormente fora declarado nulo polo Xulgado do Contencioso, o Consorcio Galego iniciou os trámites para a construción da segunda escola infantil en Bertamiráns.

Mais recentemente o día 8 de novembro do 2010 dirixíronse ó concello vía correo electrónico, solicitando ós efectos de formalización da cesión en favor do Consorcio, que realicemos os trámites necesarios para facer efectivo o acordo de cesión co fin de proceder á construción da escola infantil. Cóstanos que están coa elaboración do proxecto técnico para a construción dunha escola infantil de seis unidades, de modo

que, unha vez recibida esa comunicación vía correo electrónico, prodúcese unha providencia da Alcaldía na que se solicita a realización dos trámites necesarios para facer efectiva a cesión. Obran no expediente os informes e a documentación correspondente, así como un informe de Secretaría Xeral. Neste informe a señora secretaria di que na cesión gratuíta dos bens de titularidade das corporación locais, o primeiro requisito que precisa o expediente é que os bens a ceder teñan o carácter de patrimonial, isto é, que se tramite expediente de desafectación para o caso de que os bens teñan carácter de demaniais. Informa tamén que a alteración da cualificación xurídica se regula no artigo 8 do RBEL e require expediente no que se acredite a súa oportunidade e legalidade, que a oportunidade e legalidade da desafectación no presente expediente queda acreditado porque a cesión gratuíta sería para a construción dunha escola de educación infantil e realizaríase a favor da Xunta de Galicia, concretamente ao Consorcio Galego do Servizo de Igualdade e do Benestar. Termina o seu informe a Secretaría informando favorablemente que o pleno da corporación por maioría absoluta adopte acordo de desafectación para a súa posterior cesión gratuíta ó Consorcio Galego do Servizo de Igualdade e do Benestar para a construción dunha escola de educación infantil. É polo tanto requisito imprescindible para a adopción do acordo a maioría absoluta do número legal de membros da corporación.

Intervén polo grupo municipal popular don **Santiago Amor Barreiro** que di que quere introducir unha *emenda in voce* a este punto e polo grupo municipal do BNG don **Xosé Manuel Fernández López** tamén anuncia querer facer unha *emenda in voce* sobre este asunto.

O alcalde don **Carlos Antonio Fernández Castro** concede a palabra, ó voceiro do grupo municipal do BNG don **Xosé Manuel Fernández López**.

O señor **Santiago Amor** solicita facer unha pregunta técnica, se pode pronunciarse a señora secretaria sobre o procedemento a seguir cando hai unha proposta e dúas emendas. Contesta a secretaria xeral da Corporación dona **Rosa Ana Prada Queipo** que é unha cuestión que non está regulada, ante o baleiro o normal é seguir o réxime de intervencións do pleno, pero en todo caso que decida o alcalde, como presidente da Corporación.

Intervén o señor alcalde don **Carlos A. Fernández Castro** que lle outorga a palabra ó voceiro do grupo municipal do BNG don **Xosé Manuel Fernández López** que di substancialmente que todos os grupos municipais coinciden na necesidade da escola infantil municipal, inclusive na urxencia desta escola infantil, porque os datos manifestan a evidente insuficiencia de prazas escolares neste nivel, tanto en Bertamiráns como no Milladoiro. En Bertamiráns están censados case 550 rapaces, por non falar do rural e do seu entorno, e as prazas na escola municipal “O Bosque” deben rondar os cento e poucos. A súa posición resúmese nunha expresión, escola infantil para Bertamiráns, si, pero non así.

Respecto desta parcela, se reiteran na posición que tiñan no pleno de febreiro e considera unha chapuza urbanística que se pretenda encaixar unha escola infantil entre a casa da cultura e o centro de saúde. Profundiza nun dos erros urbanísticos deste concello dende hai moitos anos, parcelas de equipamento insuficientes, con pouca perspectiva de futuro, como a do colexio A Maía, no que está todo apelotonado, sen apenas espazos de ampliación e con espazos libres claramente insuficientes para os rapaces.

Atopámonos cun déficit na xestión urbanística e un déficit de previsión para que o día de hoxe podamos contar con parcelas para equipamentos necesarios. O BNG considera que hai outras opcións de parcelas mais adecuadas en diferentes estadios do desenvolvemento urbanístico, algunhas xa rexistradas de titularidade municipal e outras cualificadas no planeamento como equipamento que son susceptibles de ser

xestionadas para a súa utilización, Podería estudarse a posibilidade, isto seguro que os promotores locais o verían con agrado, de utilizar baixos amplos con dificultades de venta, nalgún edificio, próximo a espazos públicos, a parques públicos, que poderían ser susceptibles de converterse en escolas infantís. Non houbo por parte do goberno municipal, dende febreiro, ningunha vontade de diálogo e moito menos propósito de emenda, prefiren reiterar os erros de febreiro e xogar no terreo da rentabilidade electoral ou partidista. Non imos a facilitar esta operación porque é unha verdadeira chapuza urbanística, dende febreiro ata novembro cando menos se puido facer unha aproximación ós grupos municipais para intentar buscar algunha solución, a posición de diálogo permanente non debe confundirse con debilidade.

Cree o grupo do goberno que vai quitar mais rédito político, cun titular na prensa dicindo o BNG, probablemente tamén o partido popular, culpables de que non haxa unha parcela para a escola infantil. O grupo municipal do BNG propón unha para empezar, que non é a única, pero para empezar pon unha enriba da mesa, a parcela municipal da avenida da Peregrina, que é de titularidade municipal, que ata agora ten outro destino e que parece que ese destino non vai a saír a diante a corto prazo.

Neste punto hai certa confusión, en febreiro era unha posta a disposición que non é o mesmo que unha desafectación ou unha cesión. A posta a disposición se podería apoiar se consideráramos a parcela adecuada. En febreiro non había comunicación ningunha, agora hai un correo electrónico dunha técnica que di que queren facer unha escola de educación infantil e sen sacarlle mérito a esta técnica xurídica, non di nada dos metros cadrados que necesita, nin de unidades. Cando foi a petición de parcela para o instituto había unha comunicación con rexistro de saída, rexistro de entrada, asinada onde dicía, 16 unidades mais 6, necesitamos 10.850 metros cadrados, especificaban a parcela que necesitaban. En febreiro cando ven unha carta da Xunta dirixida ó alcalde, en relación co novo CEIP do Milladoiro, ven tamén un documento da Xunta asinado e explicita que necesita unha parcela de 12.150 metros cadrados. Neste caso non hai nada diso, hai certa confusión ou pouca claridade. Remata dicindo que teñen unha emenda in voce que é moi simple: *Instar ó goberno a convocar os tres grupos da corporación para estudar e consensuar unha mellor ubicación da nova escola infantil en Bertamiráns.*

Toma a palabra polo grupo municipal popular don **Santiago Amor Barreiro** que saúda a todos os presentes e di substancialmente que o queda claro é que Bertamiráns necesita unha escola infantil e por iso a Xunta quere construír esa escola infantil, igual que quere facer un novo colexio no Milladoiro, neste último atopa mais atranco porque hai unha solicitude do 22 de febreiro e despois de nove meses e case tres días aínda non hai resposta.

Centrándose na gardería, houbera sido mais fácil para eles sería mirar para outro lado, votar afirmativamente a proposta que nos quere meter a calzador o grupo do goberno e non discutir pero o seu grupo está no pleno para propoñer alternativas e asumir as responsabilidades que lles tocan. Nestes últimos sete anos poderían cualificar a actitude do grupo de goberno en materia urbanística como de improvisación, falta de previsión, e incluso de toma de decisións arbitrarias, unha nula vontade de chegar a acordos nesta materia cos grupos da oposición. Estas actitudes están tendo prexuízos e posiblemente, poidan ter mais. Hai situacións como as que xa se viviron co S-15, Travesía do Porto Sur que estivo parado durante case sete anos e que despois anulou unha sentenza xudicial, tamén a situación das Pateiras aquí en Bertamiráns, é dicir hai unha falta de planificación en materia urbanística que o final se reflicten nestas decisións que se toman que son improvisadas. No pleno de febreiro xa dixeran o que opinaban sobre a parcela, cercena a capacidade de ampliación do parque, do centro de saúde, orixina problemas organizativos e de funcionamento da casa de cultura, incluso desaparecería unha zona de aparcamento que agora cree recordar que está nas 20 prazas e que incluso se podería chegar a



ampliar. Está o croquis que se fai polos servizos técnicos, de como quedaría esa parcela única, que é unha aberración e está metida a calzador. A parcela non é a mais axeitada, temos outras opcións en Bertamiráns para unha gardería digna que poidamos ampliar, con espazos, e cómoda tanto para os pais como para o resto dos veciños. Dende o grupo municipal popular presentan unha emenda, agora coñecendo a emenda do grupo municipal do BNG lles parece ben e poderían votar afirmativamente esa emenda, eles ca súa emenda o que piden é parecido, aínda que fan propostas concretas. *O primeiro que piden é que se fagan os trámites necesarios con carácter de urxencia para que se poida poñer a disposición da Xunta de Galicia unha parcela axeitada para a construción dunha escola infantil en Bertamiráns en vista que o Plan Xeral de Ames ten parcelas suficientes, aptas e que cumprirían coas características axeitadas para ubicar a Escola infantil en Bertamiráns e propoñen que se estuden entre outras, porque así llo manifestaron no departamento de urbanismo, que podería ser unha parcela que está situada no Rego dos Pasos Sur que ten unha superficie de 3,300 m<sup>2</sup> e incluso unha parcela que hai na avenida de Azcárraga, en fronte case da capela da Peregrina, que ten aproximadamente esa parcela de equipamento para o concello en torno a 6.523 m<sup>2</sup>.* Hai uns técnicos que son os que teñen que traballar na materia e que deberían de ter traballado nesta materia por indicación do alcalde, que é o responsable de urbanismo. Á vista da documentación, e o tempo que transcorreu dende o pasado mes de febreiro, non foi así. Facer a escola de educación infantil noutra parte de Bertamiráns conseguiría que non se cercenara a ampliación do centro de saúde, que a casa de cultura non tivera problemas de funcionamento, que houbera prazas de aparcamento, e que en definitiva tiveramos unha escola infantil nunha zona axeitada para falar de futuro e camiñar cara o futuro no caso de que houbera unha posible ampliación se fora necesario. Queren a escola infantil pero non na parcela que propón o grupo de goberno, si o goberno propón outras alternativas vai a contar co apoio deste grupo municipal, o dixo en privado e o di en público.

Intervén o señor alcalde don **Carlos A. Fernández Castro** para dicir substancialmente que é mais que evidente que os dous grupos da oposición non lles gusta nada a idea de que salga adiante a proposta do goberno municipal. Falan de poñerse de acordo na parcela, falan doutras alternativas pero non se centran en cales, e xa ten sucedido neste pleno que propoñían como ubicacións alternativas para algún equipamento, parcelas que están na teoría, na entelequia, pero que non son parcelas de titularidade municipal. Todos temos algunha experiencia do difícil que é xestionar pola vía da vontade anticipada dos propietarios a cesión de parcelas. No goberno de coalición, algunha xestión se tivo feito e sabemos que é difícilísimo. Por suposto nos últimos sete anos, dende esta Alcaldía se ten establecido contacto con moitos propietarios para conseguir cesións anticipadas, dende a zona verde que pretendíamos facer no lugar de A Grela, moi preto do Milladoiro, e que queríamos conseguir anticipadamente e non fomos quen de conseguilo. Para o campo de fútbol do Milladoiro, o señor Fernández e un servidor, estivemos facendo xestións e non fomos quen de completar a parcela para o campo de fútbol, creo que temos catro documentos de cesión anticipada pero o resto dos propietarios negáronse a asinar. Unha vez se tivo producido o día 25 de febreiro de 2010 o inicio do expediente para a posta a disposición de parcela na localidade de Bertamiráns para escola de educación infantil, ese documento, con toda a documentación gráfica correspondente, foi enviada á Xunta de Galicia. Independentemente despois de que ese acordo fose anulado, no Consorcio iniciaron o estudio desa parcela, e como consecuencia dese estudio nos mandan o 8 de novembro ese correo electrónico que vai dirixido a Secretaría, e non a Alcaldía, e iso é anecdótico. Nese correo electrónico menciónase o acordo plenario adoptado polo concello o 25 de febreiro de 2010, polo tanto dunha parcela determinada na localidade de Bertamiráns e solitan a realización dos trámites necesarios para facer efectivo o acordo de cesión e proceder así a

construción da escola infantil, O organismo mais especializado en escolas infantís a nivel autonómico acepta a parcela, nos da o OK e nos di, sigan a diante, e para os efectos de formalización da cesión, realicen os trámites necesarios, polo tanto nin hai dúbidas nin hai oscurantismo, nin hai necesidade de meter a calzador ningunha parcela, en todo caso o Consorcio podería ter contestado en sentido negativo dicindo tomaron vostedes un acordo pero mándannos unha parcela que é unha birria. Quen ten a obriga de gobernar o concello frecuentemente está en moitísimas mais conversas e xestións e ten moitas mais fontes de información que os da oposición, pero, goberno e oposición tiveron a oportunidade de ler o 8 de novembro de 2010 en diversos medios de comunicación, noticias publicadas como esta que di que “Benestar confirma as escolas infantís para Ames e o Pino para 2011”. A conselleira tamén no parlamento compareceu para dar conta do contido dos presupostos do seu departamento que contempla a execución de 25 novas escolas infantís da rede A Galiña Azul, nove de elas na provincia da Coruña e destas, dúas beneficiarán á comarca de Terras, pese a que non se explicitan en partidas específicas, Mato comprometeu en sede parlamentaria a execución durante o próximo ano das garderías autonómicas de Bertamiráns en Ames e O Pino.

Noutro medio de comunicación fálese tamén da mesma cuestión e dáse a noticia de que “Benestar prevé poner en marcha el año que viene otras mil plazas de guarderías”. La Voz de Galicia menciona claramente o caso de Bertamiráns. Polo tanto existe un compromiso público, un compromiso expreso e feito ademais en sede parlamentaria pola propia Conselleira. Polo tanto ao Concello o que lle corresponde é facilitar a parcela, e facilitamos unha parcela que por suposto reúne tódolos requisitos, pero esa non é unha discusión política, os políticos do goberno municipal, que temos opinión como é lóxico, necesitamos algún aval técnico. Ofrecemos unha parcela que ten a clasificación e a calificación oportuna, por certo, o Centro de Saúde foi cedido polo Pleno deste Concello a Xunta de Galicia coa súa propia parcela, polo tanto, cando así o fixemos, a propia Xunta nos dixo que si algún día tiñan que ampliar o Centro de Saúde o PAC faríano con unha planta máis porque a parcela que teñen cedida é unha parcela de forma cadrada onde está enxerto xa o edificio e non fora de ese ámbito. O informe técnico de si a parcela é idónea ou non, non é unha cuestión política, é unha decisión fundamentalmente técnica, eu como alcalde deste Concello, fixen averiguacións que seguramente podería facer calquera, con moita mais facilidade que ninguén, o grupo popular, porque é quen goberna na Xunta de Galicia, e en varias ocasións preguntei se a parcela que propoñíamos tiña algunha traba, e sistematicamente me dixeron que non, pero esta mesma mañá tiveron a oportunidade de obter un documento do Consorcio Galego de Servizos de Igualdade e Benestar, e ten ademais o membrete de Enmacosa Consultoría Técnica. Este documento titúlase Informe Urbanístico de Parcela e é o documento no que se basea o Consorcio Galego para pedirnos precisamente que fagamos os trámites de continuar con esta parcela. Hai un arquitecto que firma isto, o xefe de asistencia ou asesoría técnica, asina este documento o 6 de outubro, e isto explícame porqué o 8 de novembro, nos din que adiante cos trámites. O informe urbanístico de parcela fala da obra da escola infantil de Bertamiráns de seis unidades, situación da parcela Travesía do Pedregal – Bertamiráns (Ames – A Coruña), propiedade, aínda no o é pero dan por feito que a propiedade é da Consellería de Traballo, Igualdade e Benestar, toda vez que coñecen da nosa vontade de cederlla, Di o informe: O presente informe realízase a solicitude do Consorcio Galego de Igualdade e Benestar dentro do contido da asistencia técnica que Enmacosa realiza como servizo de apoio e supervisión de proxecto e no seguimento das obras. Unha vez recibida a solicitude realizase unha visita o 19 de abril de 2010, consúltanse diferentes bases de datos telemáticas e planimétricas, facilítase por parte do Concello planos urbanísticos da parcela, faise reunión co alcalde do Concello, para proceder a súa valoración e redactar o presente informe. Aparece a parcela coa configuración, que facilita o Concello con esa forma case de

martelo ou máis ben case de hacha, aparece a ortofoto ubicando a parcela, falase que a normativa aplicable son as normas do Plan Xeral de Ordenación Municipal vixente de Ames, do ano 2002, e menciona as características de edificabilidade e dos retranqueos. A parcela non será moi boa, segundo vostedes, pero aínda así a parcela permite unha separación a testeiros de 3 metros que é o que marca a ordenanza municipal. Referido os terreos teñen unha superficie aproximada de 1.500 metros cadrados con acceso dende dúas rúas e propónse a execución dun programa en función de un so andar polo tanto, nin sequera é necesario ir a un segundo. O propio arquitecto fala dun só andar no cal unha parte da parcela a que ten fronte a praza de Chavián, quedaría destinada a zona de aparcamento, polo tanto non ocupan a totalidade da parcela, deixando aínda así unha zona de aparcamento e acceso ao edificio, o resto quedaría destinado a zona de servizos e conectaría mediante un corredor. A segunda parte do edificio se destinaría a zona de aulas e zonas destinadas a nenos/nenas. No Apartado 3: Análise funcional, instalacións. O informe di: Os terreos que se propoñen forman parte dunha zona de uso dotacional, esta zona ten aparcamentos así coma axardinamentos, o cal o poñen como unha característica positiva, di que descoñécese a calidade da acometida eléctrica polo que se recomenda se solicite información a compañía subministradora.

No apartado 4, isto é moi importante e me gustaría que se quedaran ca literalidade do texto, di: “ A parcela cumpre os requisitos urbanísticos e funcionais, conta con servizos de saneamento, auga e redes eléctricas e de telecomunicacións “ e este non é un informe que estea inventando eu, nin é un informe que sexa de debate político, o que pasa é que señores do partido popular coma ocorre habitualmente vostedes aquí son o parapeto e a obstrución, e os seus irmáns maiores na Xunta fan o que deben facer, e moi frecuentemente os deixan co cuíño o aire porque vostedes se sitúan nunha posición de parapeto, e isto que fixen eu esta mesma mañá, vostedes teñen máis facilidade para facelo.

O quinto punto, de Análise funcional e instalacións di que a parcela ten xeometría irregular, formada por dúas zonas con fachadas a Travesía do Pedregal e a Praza de Chavián, pero en ningún momento di que iso sexa desfavorable.

Polo tanto a parcela é idónea para unha escola infantil, vostedes empéñanse en que non pero no fondo está a cuestión de querer saírse ca súa e de querer demostrar que aquí hai un goberno en minoría. No apartado conclusións o informe di: dende o punto de vista funcional o recinto adecúase ás necesidades funcionais e espaciais da escola infantil de seis unidades programada.

Isto é un informe perfectamente contundente, feito en Santiago a 6 de outubro de 2010, redactado polo arquitecto xefe da asistencia técnica, polo tanto os técnicos e a propia Consellería a través do Consorcio dan o visto e praxe completo e definitivo a esta parcela. O que vostedes plantexan nas súas enmendas, no caso do BNG é un rogo: o Pleno da Corporación insta o goberno municipal a convocar os tres grupos da corporación a estudar e consensuar unha mellor ubicación da nova escola infantil. Eu non teño ningún inconveniente en estudar e consensuar se existira unha mellor ubicación, pero co compromiso de que se chegamos a esa xuntanza, e ninguén é quen de poñer enriba da mesa outra parcela, e sabendo que ésta ademais goza da aceptación do noso partener, esta se acepta. O grupo popular fala dunha parcela situada no Rego dos Pasos que ten unha superficie de 3.300 metros cadrados, pero de quen é esa parcela?, falan dunha parcela na Avda. De Azcárraga de 6.523 metros cadrados e de quen é esa parcela?, señor Amor o que vostede descoñece é que este goberno e esta alcaldía xa fixeron as xestións oportunas nesas e noutras moitas parcelas, o que pasa é que os propietarios poden querer ou non querer, porque non existe unha forza coercitiva que lle obrigue aos propietarios a cedela anticipadamente.

Contesta o señor Amor: xestíonea. Segue o señor alcalde, non pode poñerme deberes señor Amor, eu sei que a vostedes lles doe moitísimo, porque isto é un furúnculo moi molesto, os seus irmáns maiores da Xunta, e os técnicos competentes na materia, fan un informe que non deixa lugar a equívocos, si se empeñan a opoñerse a esta parcela, evidentemente a xeometría variable, esa que en outros ámbitos parlamentarios tanto se fala dela, van a gañar a votación, pero vanlle facer perder a Ames. Ten unha segunda quenda, señor Amor, ponse moi nervioso, está moi nervioso e moi preocupado, non interrompa, é a terceira vez que lle chamo a atención nesta mesma sesión. O goberno municipal trouxo e volve traer aquí unha parcela froito da agrupación de tres, que cumpre os requisitos, si non sae adiante é en contra de calquera razón de peso, sobre todo con este informe que vale o seu peso en ouro do Consorcio Galego.

Toma a palabra polo grupo municipal do BNG don **Xosé Manuel Fernández López** que substancialmente di: Empezamos polo informe, efectivamente o informe do Consorcio ten que ser sobre esa parcela, madialeva que lle fóramos a presentar unha parcela que fose zona verde, temos que presentar unha parcela que sexa de equipamento, que temos que ofertar unha parcela de 1.500 metros cadrados, non dixeron en ningún sitio que necesitaban 1.500 metros cadrados, eu polo menos non o lira, din que conta con 1.500 polo tanto fan o informe sobre unha parcela que se lle ofrece e que compre coas condicións urbanísticas e funcionais, e din, esa parcela mide tanto, esta cualificada como tal, ten luz, auga, un posible aparcamento cerca da Casa de Cultura, do Centro de Saúde, polo tanto é un informe técnico, pero non creo que sexa o Consorcio, nin os técnicos do Consorcio os que velan pola calidade urbanística deste Concello, nin pola idoneidade. Nos o que poñemos en cuestión, non é que non teña os metros, que non poidan cumprir co uso funcional, ou que non teña auga, iso no no puxemos en cuestión, estamos poñendo en cuestión que encaixar aí un equipamento, habendo posibilidades de outras parcelas, parécenos un erro urbanístico. Se ese informe técnico é o aval que vostede lle vai ensinar os veciños para xustificar que vai encaixada aí a escola infantil, preséntello, pero dende logo é un argumento do máis pobre, vostede enrocouse en que tiña que ser aí, ese informe non estaba en febreiro, e para vostede, xa era a máis adecuada. Non utilice informes técnicos como argumento fundamental dunha chapuza urbanística, non estamos de acordo con esa proposta, nos propuxemos unha, atrevémonos a propoñer unha, a da Avda. da Peregrina a que se falaba que nun futuro foxe o Concello, é titularidade municipal, equipamento público, ten saneamento, ten luz, ten auga, ten fibra óptica que pasa pola veira, que acaban de instalar, aparcamento, non creo eu que nesta lexislatura fagamos o Concello, e na próxima o dubido, pero bueno, aínda habería tempo suficiente a xestionar parcelas para un futuro Concello. Nos tiñamos aquí varias, algunhas de acceso directo coma esta e outras que efectivamente son de xestión, pero a LOUGA tamén establece os mecanismos para a xestión e para a consecución de equipamentos públicos. É difícil conseguir os terreos, pero para que non utilizara ese argumento xa lle propuxemos unha inmediata. Menciona outra vez o do campo de fútbol do Milladoiro, xa o mencionou máis veces aquí, cando eu marchei do goberno o campo de fútbol levaba xestionado o 50% do terreo, todas aquelas persoas coas que falei, lle correspondía a vostedes xestionar o outro 50%, e iso era en solo rústico apto para urbanizar, que era cualificación conseguir ese solo máis difícil. Pero hai solos urbanizables, solos urbanos, parcelas aquí en Bertamiráns, polo tanto, o do campo de fútbol, concordo en que non é fácil, e é moito máis difícil se non se fai a xestión, a LOUGA establece mecanismos para conseguir o solo. Insisto o Consorcio non é quen vela pola calidade urbanística de Ames, e eses informes son puramente informes técnicos, temos exemplos neste concello onde por idoneidade urbanística promovimos que houbese cambios no deseño urbanístico e dos plans, por idoneidade, eu non sei se o S-15 serve como exemplo, cando chegamos nos no S-15 había unhas pastillas alongadas que non nos gustaban porque había moita

ocupación do espazo, preferíamos que fose ocupación de espazo en altura, para liberar espazo para zona verde e zonas libres, por poñer un exemplo, que houbo máis. Non temos ningún prurito de votarlle abaixo esta proposta, facémolo porque estamos convencidos de que non é unha boa operación urbanística. Polo ben de Ames debíámonos sentar os tres grupos municipais e estudar alternativas a esa parcela.

Toma a palabra o voceiro do grupo municipal popular o don **Santiago Amor Barreiro** que substancialmente di: O que quedou claro é que levamos perdidos nove meses, dende o mes de febreiro cando xa manifestamos o que opinábamos desta parcela xa dixemos que hai alternativas, só lle pido que traballen para conquistar a través das formulas que sexan necesarias e que nos permita a lei, a través dun convenio cos propietarios, a disposición anticipada dos terreos, eu creo que tivo tempo, dubido que o fixera, e aínda lle queda tempo para conquistar outra parcela. Eu creo que si lle imos aos veciños cunha proposta do que quere a Corporación municipal e que estamos todos de acordo, eu creo que os veciños, algún pode enrocarse e ser tozudo, pero eu creo que a maioría dos veciños é sensata, e poden aceptar unha proposta de toda a Corporación. Vostede se quere nun mes pode poñer a disposición da Xunta de Galicia outra parcela, hai un ofrecemento de que os voceiros municipais se reúnan con vostedes e busquemos fórmulas, e alternativas, o que pasa é que vostede non fixo os deberes, fallou na xestión urbanística municipal, e mire, xa sabemos que a parcela tecnicamente é factible, pero todos sabemos que non é a máis idónea. Poñámonos que o Consorcio fai aí a gardería, o Consorcio cando remate a construción da gardería lle vai dar igual quen vai a gardería, quen vai ao Centro de Saúde que vai ao Pavillón Polideportivo, Casa da Cultura, lle da igual, o Consorcio colle planta aí un edificio, o problema xa non é deles o problema é pa nós, o dicir a nós tamén me refiro os veciños de Bertamiráns, porque se no futuro queremos ampliar o Centro de Saúde vai a estar aí esa gardería, por certo o Centro de Saúde ten unha ocupación máxima desa parcela, veremos si o Sergas no seu momento fai o que quere nesa parcela, porque eu creo que hai unha ocupación máxima en planta, salvo que haxa algunha disposición que llo permita. O Consorcio vaille dar igual se hai un problema de tráfico, se hai un problema na xestión do día a día da Casa da Cultura ou se queremos ampliar a Casa da Cultura ou se queremos ampliar a gardería, o que é curioso, e así mo trasladaban os nosos irmáns maiores coma a vostede lle gusta chamar, é que en Bertamiráns, só plantexaran unha opción para facer unha gardería, lles estrañaba moitísimo. Xa lle dixemos que vostede busca o titular, busca responsabilizar sempre os demais cando a responsabilidade é súa, por non xestionar o urbanismo deste Concello, poderíamos mirar para outro lado, votar afirmativamente, deixar en evidencia aos demais e non discutir sobre este asunto, pero eu creo que non debemos de facer iso, e asumimos tódalas consecuencias.

Toma a palabra o señor alcalde, don **Carlos A. Fernández Castro** que substancialmente di: Mire señor Amor, vostede ten neste Pleno o papel máis difícil de todos, di que levamos perdidos nove meses, pero dende que fixemos a proposta a consellería fixo os seus análises o seus estudos, e agora nos pide que formalicemos definitivamente a cesión, O señor **Santiago Amor Barreiro** di: Non intente desviar a atención. O señor **alcalde** lle chama a atención por intervir sen estar no uso da palabra e lle advirte e pide que conste en acta unha nova advertencia e continúa, mire aquí ninguén perdeu nove meses porque a Consellería, o Consorcio Galego estivo traballando durante este meses, valorando esa parcela, e confirmando e comprobando que ademais de urbanísticamente, funcionalmente esa parcela funciona. E volvendo a acta do mes de febreiro, cando leo a súa intervención, di vostede: non avalada, agora que a parcela si ven avalada, xa non lle vale tampouco, non lle vale o aval dos seus irmáns maiores. Di vostede ademais cousas tan vacuas como que o Consorcio vaille dar igual, que vai a construír aí a escola e vaille dar igual, iso é absoluta ignorancia de como funcionan as cousas, quen xestiona a Galiña Azul

do Milladoiro é o Consorcio, quen queda ca escola nas mans é o Consorcio. O señor alcalde solicita que se tome nota de novo do chamamento á orde do señor Amor que non está no uso da palabra. Ao Consorcio señor Amor non lle vai a dar igual porque xestionará, supoño que para sempre esa escola, teñen o 51%, elixen o persoal, dirixen o funcionamento da escola, e xestionan a matrícula e todos os demais elementos da mesma porque non é municipal, a diferenza da escola O Bosque, polo tanto, non se van a desentender. Estráñase de que o Concello de Ames so plantexase unha alternativa ao Consorcio, cantas alternativas lle plantexaron os demais, eu fágo lle esta pregunta, mire vostede tódalas solicitudes que hai e tódalas propostas que hai e verá vostede cantas alternativas plantexan os demais concellos, polo tanto a min non me vale escusarse en esas razóns de mal pagador, no caso do BNG hai un novo enrocamento, como xa sucedeu historicamente nesta lexislatura co Centro Social de Agrón, cando decidimos facer o Centro Social de Agrón o BNG, foi casa por casa, facéndolle campaña aos veciños, dicíndolle que non era o sitio idóneo, que era moito mellor rehabilitar o teleclub da igrexa católica, a casa chamada de Torán. Unicamente por racionalidade este Pleno por maioría, co orgullo do grupo popular, tomou a acertada decisión de non ir a rehabilitar unhas ruínas, e facer unha nova casa que iso si, cando se rematou non tiveron ningún problema en ir facer a foto oficial. Interrompe o señor **Fernández López** dicindo: porque somos concelleiros e representamos a 2.800 persoas, ou ¿paga vostede a casa de Agrón?, ¿pagouna do seu bolsillo?. O señor alcalde don **Carlos A. Fernández Castro** volve pedir que se anote a interrupción e continúa: Polo tanto, miren vostedes, ofrécese unha parcela, unha parcela que antes cualificaban de chapuza e agora resulta que non é a mais idónea. Eu sei que lles doe que o goberno municipal en minoría sexa quen de obter da Xunta o compromiso de facer unha escola, e ademais co informe favorable. O señor alcalde ante as novas interrupcións do señor Fernández López que pide que consten, di: Dios mío como se poñen de nerviosos, é increíble, a parcela reúne os requisitos, a parcela ten o aval do Consorcio Galego, se vostedes non a queren utilizar pois teñen maioría para elo, pero nos imos a someter esta parcela a votación.

Hai dúas emendas presentadas, hai unha proposta presentada e como corresponde cando hai emendas vanse a votar en primeiro lugar as emendas presentadas. Sometémolas polo mesmo orden en que foron presentadas.

A secretaria dona **Rosa Ana Prada Queipo** pide a palabra e di: Plantexou o voceiro do grupo municipal popular antes cal era a orde de intervención en materia de enmendas, o ROF non pon nada e no Concello non hai regulamento orgánico, o lóxico é que se sigan o turno das intervencións normais do pleno, pero tamén o ROF di que o alcalde dirixe ao seu prudente arbitrio as intervencións.

Sometida en primeiro lugar a votación a emenda in voce do BNG, que di: *O Pleno da Corporación insta o goberno municipal a convocar aos tres grupos da corporación para estudar e consensuar unha mellor ubicación da nova escola infantil en Bertamiráns* queda aprobada cos votos favorables dos grupos municipais do BNG e popular e os votos en contra do grupo municipal socialista.

De seguido se somete a votación a emenda in voce do grupo municipal popular que di:

*Primeiro: Facer os trámites necesarios e con carácter de urxencia para que se poidan poñer a disposición da Xunta de Galicia unha parcela axeitada para a construción da escola de educación infantil en Bertamiráns.*

*Segundo: En vista de que o PXOM de Ames ten parcelas suficientemente aptas e que cumprirían coas características axeitadas para ubicar a escola infantil en Bertamiráns, propoñemos que se estude a posibilidade entre outras das seguintes:*

*A- Parcela situada no Rego dos Pasos Sur, que ten unha superficie de 3.300 metros cadrados.*

*B – Parcela situada na Avda. De Azcárraga, cunha superficie de 6.523 metros cadrados.*

*Estas posibilidades se poderían materializar facendo xestión urbanística, mediante as distintas fórmulas que os técnicos contemplan, como poden ser a través de convenios cos propietarios dos ámbitos, posta a disposición anticipada ou calquera outra que a LOUGA dispoña.*

*Coa aceptación desta emenda, se conseguiría que non se menoscabara a capacidade do futuro desenvolvemento dos ámbitos, sendo o custe económico para o Concello mínimo, e Bertamiráns quedaría dotada cunha escola infantil nunha parcela axeitada tanto para a actualidade como de cara ao futuro.*

Sometida a votación é aprobada cos votos a favor do grupo municipal do BNG e popular e os votos en contra do grupo municipal socialista.

Intervén o señor alcalde don **Carlos A. Fernández Castro** dicindo que quedan aprobadas as dúas emendas, non procede votar a proposta do goberno por quedar enmendada.

Interven o señor **Amor** para facer a seguinte **explicación de voto**. Bastante triste é que frivolice, que se ria, que se mofe, que nun tema bastante serio, vostede non haxa querido chegar a un acordo, nin que haxa buscado outra opción para plantexarlle ao Consorcio, outros concellos aportaron parcelas que son viables tanto urbanisticamente como funcionalmente, e que non darán no futuro problemas como os que pode acarrear a cesión e desafectación desta parcela.

Contesta o señor alcalde, don **Carlos A. Fernández Castro** dicindo: Outros concellos presentarían parcelas viables urbanística e funcionalmente igual que esta, cheguei a acordo coa Consellería de Traballo e Benestar e co Consorcio Galego de Servizos Sociais e de Igualdade. Seguramente teña que volver a este pleno esta mesma parcela dentro duns meses por ser a única alternativa viable para facer a escola.

#### **Punto Sexto.- Convenio de colaboración para a construción dun centro de transformación no novo acuartelamento da garda civil no Milladoiro.**

Toma a palabra o señor alcalde don **Carlos A. Fernández Castro** para dicir substancialmente que se somete ao Pleno este convenio de colaboración entre a Xerencia de Infraestruturas e Equipamento da Seguridade do Estado, Ministerio do Interior e o Concello de Ames, para a construción dun centro de transformación no novo acuartelamento da garda civil que modificará a cláusula quinta do protocolo asinado en decembro de 2007, modificando a aportación municipal que agora sería a construción dun centro de transformación valorado economicamente en 52.662,88 euros IVA incluído. Se se acepta a modificación acometeríamos o centro de transformación por un importe claramente inferior o compromiso anterior, se non se acepta seguiría vixente o protocolo anterior e aboaríamos o compromiso adquirido en aquel momento.

Toma a palabra ó concelleiro do grupo municipal do BNG don **José Ramón Arufe Vidal** que substancialmente di: Este convenio de colaboración para a construción do transformador ven a modificar o asinado en decembro de 2007, e grazas a que hai que facer esta construción póñense de manifesto varios puntos rechamantes. No protocolo inicial nas cláusulas que se refiren as asistencias técnicas, que se mal non recordo son a 3 a 4 e a 5, a Secretaría de Estado da Seguridade pon de manifesto ata tres veces, que non se fará cargo de ningún gasto relacionado coas asistencias técnicas, e sorprende que agora saibamos que se aboaron as asistencias técnicas cando as tiña que haber aboadado o Concello. Gustaríanos saber porqué o Concello

non asumiu esas obrigas que contraeu no protocolo de colaboración e tamén nos interesa saber se a garda civil nunca reclamou ese abono. Segundo imos asinar algo, un convenio sen saber se hai paridade no esforzo económico que temos que facer, sabemos que o centro transformador nos vai saír en 52.662 euros pero non temos claro canto sería o custo da dirección facultativa.

Toma a palabra o concelleiro do grupo municipal popular don **Ramón García Argibay**, para dicir que eles o que desexan é que ese cuartel da Garda Civil sexa unha realidade canto antes, e que dende logo por eles non vai a ser.

O señor alcalde don **Carlos Antonio Fernández Castro** di substancialmente que en calquera caso e dándolle resposta ó señor Arufe, en primeiro lugar o Concello de Ames non aboou esas contías porque a empresa adxudicataria da obra que é Tragsa, unha empresa estatal, por unha dinámica administrativa habitual nas obras, facturoulle a quen llo encargou, creo que a Dirección Xeral da Garda Civil, e ata pasado algún tempo ninguén do organismo pagador se decatou de que había un convenio que dicía que iso o pagaría o Concello de Ames. A propia empresa Tragsa, nos fixo chegar un escrito no que nos dicía que por un erro administrativo facturáronlle a quen non correspondía, como iso xa estaba aboado e creo que eran uns 110.000 euros, para non darlle volta atrás a todo ese procedemento, a Garda Civil nos propón un cambio, nos permutan aquela obriga por pagar o centro de transformación. En contía económica saímos moito mellor e se non queremos aceptar esta fórmula o que farán é volver coa factura da dirección de obra e da coordinación de saúde e seguridade que era o que nos tocaba.

Intervén o concelleiro do grupo municipal do BNG don **José Ramón Arufe Vidal** para dicir que en ningún momento a súa curiosidade vai supoñer un obstáculo para que se aprobe o convenio.

Rematadas as intervencións o pleno da corporación por unanimidade dos membros presentes, adopta os seguintes acordos:

**Primeiro.-** Prestar aprobación ao Convenio de colaboración para a construción dun centro de transformación no novo acuartelamento da garda civil no Milldoiro, remitido a este concello dende a Secretaría de Estado de Seguridade do Ministerio do Interior, con data 3 de novembro de 2010 (Rexistro de Entrada nº 22931) e que modificará a cláusula quinta do protocolo asinado en decembro de 2007, modificando a aportación municipal que agora sería á construción dun centro de transformación na nova edificación por importe de 52.662,88 euros.

**Segundo.-** Facultar ao señor alcalde presidente Carlos Antonio Fernández Castro para a sinatura do convenio e para cantas actuacións de trámite sexan precisas para a mellor execución do acordado.”

### **C) PARA CONTROL DO GOBERNO:**

#### **Punto Sétimo.- Mocións.**

O señor alcalde don **Carlos Antonio Fernández Castro** di que hai tres mocións presentadas en tempo e forma e que forman parte da orde do día.

Intervén o concelleiro do grupo popular don **Bernardo Moar Míguez** para dicir que o seu grupo ten unha moción de urxencia.

O señor alcalde don **Carlos Antonio Fernández Castro** infórmalle que a achegue a mesa para que sexa analizada pola presidencia informando a continuación ao Pleno do seu contido, é unha moción do grupo municipal popular, no día internacional para a eliminación da violencia contra as mulleres.



Continúa o señor alcalde para dicir que hai un punto terceiro que realmente encadra máis no apartado de rogos, é unha solicitude á administración local e si retiran ese apartado, ese punto número tres e o pasan a rogos, o resto do texto é asumible coma moción.

Intervén o concelleiro do grupo municipal popular don **Bernardo Moar Míguez** para dicir que algún punto da súa moción tamén vai dirixido á administración, e sen embargo non o tomou vostede coma un rogo. Me parece unha actitude un pouco absurda sobre todo cando imos falar dun tema que creo que é de crucial importancia para todos, que é ante todo concienciar a poboación, tamén a do noso concello. O que pretendemos ao presentar esta moción de urxencia, o que nos gustaría e incluso nos atreveríamos a solicitar de vostede un receso de dez minutos e consensuar un texto entre os tres grupos políticos, chegar a un texto en común e facer unha declaración institucional do Concello de Ames.

O señor alcalde don **Carlos Antonio Fernández Castro** toma a palabra para dicir: En primeiro lugar teremos que sometela no seu momento a ratificación da urxencia, hai tres mocións que están incorporadas na orde do día, e polo tanto empezamos polas que xa están incorporadas na orde do día.

#### **a. Moción do grupo municipal don BNG para garantir os investimentos no ensino público.**

Como propoñentes da moción, ten a palabra o concelleiro do grupo municipal do BNG don **Víctor Vicente Díaz**, que di: A moción que presentamos hoxe versa sobre os investimentos no ensino público que prevé realizar a Xunta e que recolle ou máis ben non recolle nos orzamentos do vindeiro ano. É importante que nun concello coma o noso onde a mocidade, a xente nova temos un peso bastante importante a nivel demográfico, é preciso un posicionamento pois a realidade é que os orzamentos en educación por parte da Xunta redúcense nun 7% e redúcense drasticamente as bolsas de axuda ao estudiantado en distintas facetas, tanto en bolsas de idiomas, de axudas ao FP, axudas universitarias, e axudas para a xestión dos comedores escolares, e ademais empezase a facer un tipo de xestión política que non garante os recursos económicos necesarios para o mantemento e as reparacións das infraestruturas educativas. O que propoñemos é solicitar, instar o presidente da Xunta, para que a Consellería de Educación manteña as partidas de bolsas para o alumnado que se destinan a estudar idiomas, bolsas para as prácticas de FP e para os estudos universitarios cun importe como mínimo, o recollido nos orzamentos deste ano 2010, e que se manteñan as partidas adicadas a axudas as ANPAS na xestión de comedores, cunha dotación idéntica como mínimo a deste ano, que se incorporen aos orzamentos de 2011 os recursos suficientes para que a reparación e mantemento dos centros públicos de ensino estea garantida.

Toma a palabra o concelleiro do grupo municipal popular don **Bernardo Moar Míguez**, que di: Para poñernos en antecedentes do que aconteceu nos últimos anos, gustárame comezar a miña intervención lendo un pequeno artigo de prensa de data 28 de setembro de 2008, o artigo di seguinte: Comezou o curso escolar e xa dende o primeiro momento os responsables do sector teiman en deixar claro que as eivas históricas dun sistema continúan moi presentes e que o cambio de partidos no goberno non se deixa sentir demasiado, hai mais propaganda que feitos, hai tal incompetencia e fala de solucións coma en tempos do PP, mentres a conselleira enche a boca falando da ausencia de problemas, hai directores que teñen que recorrer a ameaza para conseguir ser escoitados, mentres a conselleira, espalla canto lle serea do esforzo investidor e a prioridade no ensino público, hai unha chea de colexios con problemas tan graves coma a falla de mestres. Para o ensino público seica non hai cartos e algúns mestres teñen que dobrarse, así hai cursos de primaria que van ter ata tres titores, e aulas de infantil con 25 alumnos un deles Síndrome de

Down, e sen coidador, o que para calquera que saiba algo de ensino é unha barbaridade, os profesionais afectados usan un calificativo algo máis groso, pero no só os mestres pagan as consecuencias, é habitual o incumprimento das propias leis da Xunta no referente a manter aos irmáns no mesmo colexio, en Santiago, hai casos sangrantes de pais que teñen os fillos en dous colexios polo capricho da Xunta que leva dous anos negándolles o dereito ao agrupamento mentras no seu lugar seguen matriculando outros nenos sen irmáns no centro, pero como non hai dúas sen tres, tamén abunda a insensibilidade no caso das adopcións especiais, coñezo pais que adoptaron a catro irmáns e os que a Xunta lles negou a matrícula no mesmo centro alegando que superaba a ratio, logo éncheselles a boca pregoando medidas progresistas para conciliar a vida laboral e familiar, male que ata un bruto entendería que é un caso típico, non compre aplicar a excepción, os nenos están separados e os pais deixándose medio salario en transporte e comedores, na consellería sábese isto pero non lles importa, andan máis preocupados por favorecer os intereses do partido. Todo o aquí escrito é tanto máis rechamante, sabendo que a Xunta incrementou o gasto en protocolo e representación nun 33%, vaia, que os conselleiros e altos cargos están feitos uns merendillas, nada mudou, iso é contención do gasto superfluo e investimento nos sectores prioritarios.

Como dicía este é o texto redactado o 28 de setembro de 2008. Moi ben, unha vez máis imos debater unha moción, neste Pleno, de carácter político e partidista, dito con todo respecto pois o BNG, o que pretende a pesar de ser un grupo minoritario é impoñer o seu modelo educativo, sen admitir que estamos nunha sociedade que se deu así mesma un modelo que combina o público e o privado, non sei se será porque están confundidos ou porque queren confundir ós demais. A moción debería ser para garantir a escolarización de tódolos cativos en idade de estaren escolarizados, de non estaren escolarizados pediríamos entón investimentos para cubrir esa necesidade, pero non é o caso. Se parte dunha idea propia e excluín-te, o ensino debe ser público e non concertado, nin privado. Estamos en desacordo xa coa exposición de motivos, comézase por unha afirmación equivocada ou parcialmente equivocada, para garantir a calidade educativa do ensino público de Galicia é necesario que o investimento público garanta o acceso a mesma en igualdade de condicións para tódolos nenos e nenas, isto non é certo, mellor dito aquí hai que diferenciar por unha banda o ensino de calidade e por outra banda a garantía de que todos accedan a ese ensino. A garantía de que todos teñan acceso ao ensino é responsabilidade dos gobernos que teñen esa competencia, neste caso da Xunta. No que respecta a calidade xa é outra cousa, primeiro habería que saber que debemos entender ou que entendemos por ensino de calidade, despois habería que ver onde se imparte o ensino que se poida cualificar así. Este non nos parece o foro para resolver este concepto, digamos con todo que ensino de calidade, ensino de escasa calidade dáse en centros públicos, concertados e privados, o cal demostraría que nin o modelo, nin os medios son os únicos factores que inflúen na calidade do ensino, para xustificar este erro acúdese a unha argumentación en base a lectura e números do presuposto, pero non imos ser nos os que descubramos aquilo do valor absoluto e do valor relativo dos números, un catro é un suspenso e un cinco un aprobado, valor absoluto, pero un catro como nota máxima nun grupo onde todos sacaron entre un ou dous é unha boa nota, mentres que un cinco nun grupo onde todos sacaron un sete, un oito ou un nove, xa non é unha boa nota. Un 7% cando a media das consellerías encargadas de executar o gasto social é do 5% é unha cifra significativa, pero cando os presupostos da Xunta se reducen un 10,8% xa non é o mesmo, e comparado ca redución da media das restantes consellerías 24,7% xa é mesmo loable. En canto ás consideracións en detalle que se fan das partidas de presuposto, estamos na mesma, vostedes van por unha vía da argumentación e nos poderíamos falar doutra, din vostedes que existe unha redución drástica do investimento que pode chegar a poñer en perigo a conservación e mellora dos centros do ensino público, nos podemos dicirlle que unha

vez máis fan unha interpretación subxectiva dos posibles deberes, este ano sen ir mais lonxe arranxouse concretamente o colexio Ventín, así que creo que algo esaxeran, con todo votei unha ollada a evolución dos presupostos do Concello de Ames e estou vendo unha partida de educación que nos presupostos de 2008 ascendía a 478.203 euros e en 2010 quedouse en cero, e non se me ocorre votarlle en cara o goberno desta drástica redución, porque supoño que o que sucedeu é que foron obras e traballos que xa se fixeron antes e non hai que volver a repetir no ano 2010. A pesares do axuste económico a que nos obriga a situación de crise, a Consellería de Educación e Ordenación Universitaria manterá un financiamento igual ou superior en recursos destinados a gastos de funcionamento dos centros, profesorado, comedores e transporte escolar, incorporación das TICS no ensino e fomento do plurilingüismo, o que garante a calidade na prestación do servizo educativo. Os axustes que inciden no capítulo de obras permitirán non obstante manter os niveis requiridos para o normal funcionamento dos centros educativos.

Toma a palabra o concelleiro do grupo municipal socialista don **Francisco Villaverde Marcos**, para dicir: Boas noites a todos e a todas. Esta moción do BNG incide nun tema que realmente a Xunta do partido popular está machacando dende que empezou a gobernar, que é o ensino, o ensino público sobre todo, e quizais o señor Moar acaba de ler aí un artigo, a min gustárame saber o autor dese artigo, se ve realmente a súa ideoloxía e o que critican realmente. No 2008, precisamente no 2008 educación asumiu os gastos de gasóleos dos CEIPS de toda Galicia que estaban soportando os concellos, que se negociou no pacto local 2009, os gastos de electricidade dos centros de ensino, a asunción dos combustibles nos IES, a asunción dos gastos de limpeza, a asunción dos gastos de conserxería nos centros de primaria e a asunción dos gastos de reparacións e mantemento dos propios centros que facían os concellos. Unha redución do 7%, é posible que sea necesaria en certos aspectos do presuposto da Consellería de Educación. Non precisamente no que ten relación co ensino público e co ensino básico e obrigatorio. Nesta moción do BNG fálase de algo que é moi importante, que temos que priorizar que é a FP, fálase tamén das becas e das axudas universitarias e sobre todo a colaboración ós comedores escolares que levan as ANPAS que, senón teñen subvención practicamente son case coma comedores privados e teñen que soportar os seus gastos os propios pais dos alumnos. Creo que é fundamental que ademais de, como se solicita na propia moción, que haxa recursos suficientes para manter e reparar tódolos centros de ensino, creo que é moi importante que haxa recursos suficientes para dotar a tódolos centros de profesorado suficiente e de aqueles elementos que son fundamentais para a impartición do ensino, e falamos do ensino de calidade. O ensino de calidade é moi difícil de cualificar porque hai moitos elementos dentro do ensino para poder cualificar si é de calidade ou non, pero creo que o fundamental para un ensino de calidade son, o profesorado e os medios que poida ter ese profesorado. O profesorado en si creo que está bastante cualificado nunha porcentaxe moi alta, o que nos falla e o que nos da deficiencias na calidade son os medios, e aí é onde hai que incidir, para min persoalmente creo que a educación é tan fundamental coma alimentación, a alimentación é algo fundamental para o noso corpo, para o noso crecemento, para o noso desenrolo normal, e a educación, a formación é fundamental para a outra parte da nosa formación, intelectual, moral, a formación completa do ser humano.

Toma a palabra o concelleiro do grupo municipal do BNG don **Víctor Vicente Díaz** que di: Eu non me vou andar polas ramas como o señor Moar, e agradecería que se debatesen os tres puntos que presentamos na moción. Señor Moar, as mocións teñen un carácter político, isto senón non sei que é.

Resposta o señor **Moar** dicindo: é partidista.

Prosegue o señor **Vicente**: non, ten un carácter político, nos somos un partido político e vostedes son outro, temos unha óptica e vostedes teñen outra, é evidente que cando se fai un plantexamento e se argumenta, estamos tendo un argumento político, eu ademais son dos que pensa que todo tipo de acción dunha persoa, independentemente que simpatice ou non cun partido, é política dende o momento en que pensamos, e actuamos e temos conciencia. Cando vostede fala da redución dun 7% nos orzamentos de educación cando o resto do orzamento da Xunta redúcese nun 10% efectivamente ten toda a razón do mundo, pero é que eu non estou falando dos orzamentos en educación a nivel xenérico senón que estou especificando, unha serie de partidas moi concretas, e non estou pedindo ningún tipo de incremento, non pedimos ningún incremento senón que estamos solicitando canto menos que se manteñan as bolsas de alumnado, en primeiro lugar nos idiomas que se reducen un 35%, non nun 7%, nun 35% e isto choca bastante co discurso que teñen vostedes, de potenciar as linguas estranxeiras. Cando reducen a partida en máis dun millón de euros para as bolsas de idiomas, tamén se contradín cando hai un par de meses daban vostedes o grande número de alumnos que tiñan os ciclos formativos e agora reducen as becas para as prácticas de FP en máis dun 52%, falaba vostede antes de números, de que un catro pode ser unha boa nota, un 52% é bastante máis ca un 7%, e tamén que un 10% de redución, en canto aos estudos universitarios redúcense nun 50% aproximadamente. Esta decisión choca cunha partida de nova creación que si fan vostedes, para os centros concertados, outorgan mais de 50.000 euros para poder impartir linguas estranxeiras, parece que lles interesa a potenciación só en determinados ámbitos, e no que se refire aos comedores escolares, solicitamos novamente que se manteña a partida.

Cando no bipartito se iniciou esta liña de comedores escolares progresivamente íase incrementando a contía que este ano debía ascender ata 1.100.000 euros, e sen embargo este ano recortárono vostedes nun 35%, e en canto o que se refire o punto de reparación e mantemento dos centros de ensino, hai que recordarlle que en infantil e primaria reducen un 41% e en secundaria e FP un 67%, mais dun 67% por non falar da supresión do programa de preescolar na casa, que despois de moitísimos anos dándolle saída a un sector moi específico e que necesitaba ese tipo de iniciativas, por primeira vez despois de moitos anos de longo recorrido vostedes o suprimen integramente dos orzamentos da Xunta. O que si aparecen nos orzamentos da Xunta son os 100.000 euros para a fundación Camilo José Cela ou os 2.000.000 para cambiar os libros de texto de galego a castelán, supoño que son gastos moito máis transcendentais. Dende unha óptica política pódolle dicir que quedan claras cales son as prioridades que ten o goberno do partido popular, e queda manifestado o abandono e desinterese que teñen vostedes nun claro sector do ensino público. Solicitar, supoño que non imos contar co seu apoio, que canto menos sirva para que recapaciten un pouquiño sobre os gastos orzamentarios, efectivamente o período de recesión é delicado, pero cremos que hai determinadas partidas orzamentarias que se deberían coidar. O xogo de números xa sabemos que moitas veces é complicado pero, concretamente no que se refire a estas tres partidas, a redución é drástica, é significativa, e dende logo vai afectar e de xeito moi grave ao desenvolvemento do que viñan sendo estas políticas educativas.

Toma a palabra o concelleiro do grupo municipal popular don **Bernardo Moar Míguez** que di: Dende logo o papel absorbe todo, sobre todo cando falamos de cifras, a verdade é que non quería insistir moito no tema, pero no me vexo mais que obrigado. Cando falamos por exemplo do recorte nas bolsas para aprendizaxe de idiomas do 35%, as bolsas para realizar prácticas en empresas, de formación profesional en máis do 52% e as bolsas do alumnado universitario sobre o 50%, esa é a lectura que vostedes fan O plan de protección das linguas estranxeiras e bolsas 51,5 millóns de euros ata o 2013, para beneficiar a 40.000 alumnos e converxer así con Europa en competencias lingüísticas, este plan prevé a creación de 160 centros

plurilingües, a implantación de 1800 seccións bilingües, a formación de 13.000 docentes e 6.100 profesionais de distintos ámbitos laborais, a ampliación da oferta de escolas oficiais de idiomas e máis de 16.000 estudantes que podan realizar estancias no estranxeiro. Esta iniciativa ten coma obxectivos triplicar o número de alumnos que estuden unha lingua estranxeira, duplicar o financiamento nesta materia en relación ao investimento do bipartito, multiplicar por seis ata 450 o número de auxiliares de conversación nativos en lingua estranxeira para poder apoiar a ensinanza en inglés, este plan xa se iniciou neste curso con medidas como a creación de 58 centros plurilingües, e 1.519 sección bilingües, 3,077 bolsas para que os alumnos poidan completar as súas competencias lingüísticas noutros países, 262 auxiliares de conversa para o apoio na aprendizaxe nun idioma estranxeiro. Volvendo o de as bolsas, a Xunta de Galicia adicarlle máis de 1.200.000 euros a bolsas para estudos de FP, e máis de 3.000.000 de euros para estudos universitarios, o que supón un lixeiro descenso en relación co exercicio anterior, consecuencia da desaparición das bolsas correspondentes o terceiro ciclo, porque xa non existe. En canto aos comedores escolares a Xunta incrementará nun millón de euros os recursos para xestión directa de comedores escolares o que supón un incremento en máis dun 4% en relación co orzamento previsto no 2010 e 10.000.000 de euros máis que o que destinou o goberno bipartito no ano 2007, cando estableceu a normativa coa que pretendía universalizar este servizo. Por outra banda a pesar de que a dotación de axudas as ANPAS vese diminuída con respecto ao 2010 a Xunta intensificará neste curso a relación de coordinación con algúns concellos para a xestión directa, ou compensará a diminución na participación das ANPAS, e dende logo hai moitas ANPAS que están tamén interesadas en que a Xunta se faga cargo do servizo, polo tanto a pesares de que o bipartito deixou un burato de case 4,5 millóns de euros na partida de comedores escolares, os orzamentos da Xunta para o ano 2011 van garantir a prestación de servizo de comedores escolares con menús saudables. Fala vostede que a consellería reserva 2.000.000 de euros para cambiar os libros de texto de galego a castelán para o próximo curso, é certo, iso é a consecuencia da súa mala xestión, e o que estamos a facer é subsanar os erros do pasado, os seus erros, os votantes de Galicia deixárono ben claro, creo que non hai dúbida dilo. Nada mais, moitas grazas.

Toma a palabra o concelleiro don **Francisco Villaverde Marcos** e di: Eu vou a ser moi breve, chócame como novidoso que se fale de centros plurilingües, de inglés e de cousas polo estilo, eu xa levo tres anos fora do ensino pero sen embargo sei que tódolos centros galegos públicos son plurilingües, en tódolos centros galegos se estuda e se practica a lingua castelá, a lingua galega e inglés. Xa digo levo tres anos que non estou no ensino, e impartín parte desas linguas, xa antes de estar o partido popular ultimamente na Xunta de Galicia. Eu creo que case a maioría dos galegos somos plurilingües dende que nacemos, aínda que logo vivamos nun entorno máis castelán ou máis galego, pero eu creo que todos en xeral, aínda outros que non son nados en Galicia pero veñen logo a vivir aquí, moitas veces nos dan exemplo de como se pode falar calquera das linguas, sen problema, porque cantas máis falemos mellor, e máis no segundo ciclo, en secundaria hai un segundo idioma opcional, normalmente francés ou inglés, entre os máis escollidos polos propios alumnos. Pero hai que diferenciar o plurilingüismo, a imposición da segunda lingua, das cooficiais que temos en Galicia, que son o castelán e o galego. Entón si me choca, que haxa 2.000.000 de euros para cambiar os libros de texto de galego a castelán, realmente os libros de texto, en xeral, están en galego, excepto o de lingua castelán loxicamente que debe estar en castelán, calquera dos nosos alumnos pode expresarse e debe expresarse nas dúas linguas para iso se forma e para iso se estuda. Polo tanto creo sinceramente que os argumentos non son demasiado fortes neste caso, nin son novedosos tampouco, é poñer desculpas para impoñer algo que din que lles dou as

urnas. Nas urnas, realmente tiveron sorte e con menos votos conseguiron a maioría. Nada máis.

Rematadas as intervencións o pleno da corporación, por maioría absoluta do número legal de membros da corporación, cos votos a favor dos representantes do grupo municipal socialista e do grupo municipal do BNG e a os votos en contra dos representantes do grupo municipal popular, presta aprobación á moción do grupo municipal do BNG, do teor literal seguinte:

*“Exposición de motivos*

*Para garantir a calidade educativa do ensino público de Galiza é necesario que o investimento público garanta o acceso á mesma en igualdade de condicións para todos os nenos e nenas. Esta premisa é aínda máis importante en época de crise xa que podemos ver acentuadas as diferenzas entre as familias para poder manter un acceso igualitario á educación. Non obstante, para o vindeiro ano 2011 os orzamentos de Educación da Xunta de Galiza sofren unha baixada importante de case un 7% que afasta cada vez máis a Galiza de conseguir o obxectivo de aproximarse ao 6% do PIB.*

*O preocupante desta caída é que afecta de forma moi directa á partida de investimento, xa que existe unha redución drástica que pode chegar a poñer en perigo a conservación e mellora dos centros de ensino públicos. Asemade a redución é moi significativa en partidas que teñen como destinatario directo o alumnado. De feito as bolsas para aprendizaxe de idiomas sofren un recorte de máis do 35%, as bolsas para realizar prácticas en empresas de formación profesional máis dun 52% e as bolsas para o alumnado universitario preto do 50%. Destacando tamén o elevado recorte que sofren as axudas as ANPAs para a xestión de comedores escolares que chega a un 35%. Esta redución pode implicar que en moitos centros o servizo de comedor chegue a estar en perigo. Non obstante, e como mostra da liña política que segue o PP na Xunta de Galiza, a mesma Consellaría reserva 2 millóns de euros para cambiar os libros de texto de galego a castelán para o próximo curso.*

*Por todo isto, o Grupo Municipal do BNG proponlle ao Pleno da Corporación municipal a adopción do seguinte:*

*Acordo:*

*Instar ao Presidente da Xunta de Galiza para que a Consellaría de Educación:*

*1.Manteña as partidas de bolsas para o alumnado, destinadas a estudar idiomas, bolsas para as prácticas de FP e para os estudos universitarios, cun importe como mínimo ao recollido nos orzamentos deste ano 2010.*

*2.Manteña a partida adicada a axudas as ANPAS para a xestión dos comedores escolares cunha dotación que como mínimo se equipare á dos orzamentos da Xunta de 2010.*

*3.Incorpore aos orzamentos de 2011 os recursos suficientes para que as reparacións e mantemento dos centros públicos de ensino estea garantida. “*

**b. Moción do grupo municipal do BNG relativa ao completo desenvolvemento da Lei 11/2007 para a prevención e tratamento integral da violencia de xénero.**

Toma a palabra o señor alcalde don **Carlos Antonio Fernández Casto** que lle da palabra a dona **Olaia Alvite del Río** en representación do grupo propoñente da moción.

Intervén o señor don **Bernardo Moar** respecto da moción de urxencia presentada polo seu grupo coa que pretenden chegar a un consenso, xa que pensa que no fondo todos queren chegar ao mesmo. O señor alcalde don **Carlos Antonio Fernández Casto** responde ó señor Moar que non ten ningún inconveniente, pero que dunha vez por todas hai que plantexar con auténtica seriedade as cuestións que se abordan

no pleno. O día 25 de novembro sábese que é tódolos anos, e o que se conmemora tódolos anos, e dende hai case que dez días, convocouse primeiro comisións informativas e segundo sesión plenaria incorporando dúas moción unha do BNG e outra do grupo socialista sobre esta materia, houbo máis que tempo de consensuar. Forzarme agora con que ten unha moción de urxencia e hai que facer un receso no pleno, non é serio. Conste que non teño ningún inconveniente en facelo, ningún, conste que son as vintetrés e trinta e dúas, polo tanto non sei se agora en vinteoito minutos imos a ser quen de consensuar o que durante dez días se perdeu a oportunidade de facelo, agora se non hai inconveniente por parte dos grupos, facemos un receso.

O señor don **Bernardo Moar** intervén para dicir que a comisión informativa está para debater e consensuar, de feito nesa comisión informativa os dous grupos, partido socialista e BNG en principio quedaron de traer unha moción conxunta, co cal esperábamos ese texto conxunto para poder apoialo, como non foi así o que propoñemos é simplemente unha opción máis se a queren considerar. Di dona **Mercedes Vidal**: Non chegamos a consensuar a nosa e irmos consensuar tres. O señor alcalde don **Carlos Antonio Fernández Castro** di: Eu non quero ser un obstáculo para ningún consenso, vintetrés e trinta e tres máis quince, as vinte e tres corenta e oito reanúdase o Pleno.

Reiniciada a sesión despois do receso, o alcalde pregunta se hai algún acordo de moción única, e a vista de que non, concede a palabra polo grupo municipal do BNG a dona **Olaia Alvite del Río** que di: Moitas grazas, boas noites, non se chegou a un acordo dun texto común e se van a presentar as tres mocións e a votar separadamente vou a pasar a ler o texto que propón o BNG, incluído na orde do día deste Pleno e para que se vexa en parte a diferenza que hai entre uns textos e os outros e o porque de non chegar a unha proposta común, a moción do BNG di o seguinte:

*A violencia de xénero constitúe unha vulneración dos dereitos fundamentais das mulleres, é a manifestación máis clara e brutal da desigualdade aínda existente entre mulleres e homes existente na nosa sociedade, un indicador de que queda moito traballo para erradicar a discriminación e subordinación das mulleres e acadar unha sociedade igualitaria, nos últimos anos téñense dado pasos relevantes a nivel legal, superando unha visión que reducía o problema ao ámbito privado, e asumindo que a loita contra a violencia de xénero é un problema de primeira orde, e que na súa erradicación deben implicarse o conxunto de poderes públicos e da sociedade. Na pasada lexislatura, en Galicia deuse un paso moi importante neste senso, coa aprobación dunha Lei específica para a prevención e tratamento integral da violencia de xénero, unha lei que por primeira vez fai un tratamento da violencia de xénero dende unha perspectiva integral, recoñece dereitos para as mulleres que vivían unha situación de violencia no ámbito económico e social, e ademais articula toda unha serie de obrigas para as administracións públicas tanto no ámbito preventivo como no formativo e na asistencia as vítimas, ademais hai outro cambio relevante que introduce esta norma, que é a apertura dos recursos sociais a tódalas mulleres con independencia de que contén ou non cunha orde de protección, unha medida necesaria que vai na dirección de incrementar os resortes institucionais de apoio as mulleres, a aprobación desta lei supuxo no Parlamento, paralelamente o incremento dos recursos destinados en Galicia a loita contra a violencia de xénero. A Secretaría Xeral de Igualdade cumprindo cun mandato establecido nesta Lei informou o Parlamento galego do grao de desenvolvemento das previsións contidas neste texto legal, así como de aqueles aspectos que restaban para poñer en marcha o desenvolvemento da mesma, non obstante o novo goberno da Xunta non parece ter interese en poñer en funcionamento os instrumentos lexislativos, considerando prescindibles e superfluas as accións tendentes a erradicación da violencia de xénero, a lei prevé a creación do observatorio galego da violencia de xénero, un órgano*

*institucional da Xunta de Galicia que ten por obxecto encargarse do estudo, avaliación e seguimento das políticas de violencia de xénero, unha medida importante a fin de contar con organismos e persoal especializado que permita facer unha análise sostida no tempo sobre a efectividade das medidas tomadas neste terreo e consecuentemente mellorar a eficacia das políticas e recursos que se adican a esta finalidade. No informe elaborado a finais do ano 2008 pola Secretaría Xeral de Igualdade sobre o desenvolvemento da Lei 11/2007 consta a existencia dun borrador de decreto no que se estaba traballando a fin de poder cumprir con este mandato legal, xa no pasado 25 de novembro poñíamos de manifesto esta cuestión, máis estes e outros aspectos do texto legal quedan aínda por desenvolver, así coma outras medidas que para nos é necesario que se continúen impulsando para que teñan eficacia como son: As relacionadas coa sensibilización social ou a formación de todas e todos os profesionais en ámbitos relacionados directa ou indirectamente contra a violencia de xénero, un silencio que nos preocupa pois a erradicación da violencia contra as mulleres debe ser unha prioridade de calquera goberno, que ten que materializarse na mobilización de recursos e no cumprimento das disposicións legais vixentes nesta materia, mais alá da parálise destes puntos, estase a producir ademais un desmantelamento das poucas estruturas básicas coas que a administración galega contaba neste ámbito, acabamos así, neste momento, de asistir o desmantelamento do Servizo Galego de Igualdade e tamén a unha redución económica e de medidas en xeral para a prevención da violencia de xénero, por todo isto, o BNG propónlle o Pleno desta Corporación Municipal a adopción do seguinte acordo:*

*Primeiro – Instar a Xunta de Galicia a que realice unha planificación para a efectividade das previsións contidas na Lei 11/2007 que estaban pendentes de desenvolver, en concreto a creación do observatorio galego da violencia de xénero e a posta en marcha do centro de recuperación integral, realizar campañas periódicas de sensibilización contra a violencia de xénero, a formación da totalidade dos e das profesionais e garantir o dereito á atención psicolóxica no ámbito sanitario público que tamén estaba recollido na lei.*

*Segundo- Dar traslado deste acordo o presidente da Xunta de Galicia así coma aos grupos parlamentarios do Parlamento de Galicia.*

Toma a palabra o señor alcalde don **Carlos Antonio Fernández Castro** agradecendo a exposición e abre quenda de intervencións para os grupos municipais que desexen facelo. Polo grupo municipal popular toma a palabra don **Bernardo Moar Miguez** que di: Eu non me vou a estender moito, a violencia de xénero é algo que nos preocupa a todos, nos debe concienciar a todos, temos que pensar que os homicidios nos últimos nove anos aumentaron un 17, 65% a pesares das ferramentas humanas e económicas importantes, vemos que esta lacra social tan importante non acaba de minguar desgraciadamente. En canto a este toque que lle dan dende aquí a Xunta, só dicirlle que foi en agosto de 2007 cando entrou en vigor esta lei a 11/2007 e dende agosto de 2007 ata abril de 2009 é dicir durante 21 meses foi responsabilidade do bipartito, e concretamente do BNG a través da Secretaría Xeral de Igualdade, o cal creo que tiveron tempo de poñelo en marcha. Polo momento nada máis, moitas grazas.

Toma a palabra polo grupo municipal socialista e concelleira dona **Isabel González Cancela** que di: Boas noites, pola miña parte só dicir que como xa fixemos na comisión informativa imos apoiar esta moción.

Toma a palabra polo grupo municipal do BNG dona **Olaia Alvite del Río** que di: Un pequeno apunte, efectivamente como o nome indica, esta lei 11/2007 foi sacada a



diante, plantexada no ano 2007 polo BNG por tanto era a primeira vez na historia deste país que se plantexaba un texto legal destas características, e cando me refiro a que a Xunta de Galicia parece non estar sensibilizada suficientemente contra a violencia de xénero, básome en datos. O partido popular dende que entrou a gobernar na Xunta de Galicia, un orzamento tras outro recortou as partidas do salario da liberdade, non sei que ten que dicir vostede a iso, que se puxo en marcha na anterior lexislatura co bipartito, e co BNG responsable desa materia, e tamén no ano pasado suprimiron a plataforma de teleformación para a violencia de xénero, é dicir todas esas iniciativas que se levaron a cabo, que naceron na lexislatura pasada na Xunta de Galicia pouco a pouco foron desaparecendo e desmantelándose, é a sensibilidade que o partido popular ten neste asunto, eu remítome as probas. Nada mais.

Toma a palabra polo grupo municipal popular don **Bernardo Moar Miguez** que di: Eu creo que dende a Xunta de Galicia, non quero estenderme moito, se están a facer cousas, os recortes evidentemente témolos por esta situación de crise que afrontamos, o 45% do orzamento da Secretaría Xeral de Igualdade da Xunta de Galicia adicarase no 2011 a diferentes actuacións para previr a violencia, concienciar a poboación e atender vítimas maiores e menores. Por darlle unhas pinceladas en canto as actuacións da Secretaría Xeral, o teléfono gratuito da muller se incorporou hai tres meses, o servizo de tradución automática en 50 idiomas, accesibilidade para persoas sordas, a resolución do colapso na concesión de axudas a mulleres, o apoio en termos económicos da Xunta de Galicia a 78 CIMS que sobrepasou no 2010 o millón de euros, programa de atención psicolóxica, o programa abramos o círculo, a posta en marcha do plan de formación, información e sensibilización sobre a violencia de xénero destinado a aprobación de inmigrantes residentes de Galicia, primeiro plan de intervención con menores nos centros de acollida, posta en marcha do plan de formación e violencia de xénero, a sinatura do protocolo de actuación coa fiscalía superior de Galicia para o tratamento dos casos xerados de trata de persoas con fins de explotación sexual, colaboración coa fundación preescolar na casa para o desenvolvemento dun programa de información en igualdade, desenvolvemento en 34 concellos de programas experimentais innovadores contra a violencia de xénero por importe de 150.000 euros, plan de formación sobre o consumo e xénero, etc que como ben dicía non quero dilatar máis. Nada máis

Rematadas as intervencións o pleno da corporación, por maioría absoluta do número legal de membros da corporación, cos votos a favor dos representantes do grupo municipal socialista e do grupo municipal do BNG e a abstención dos representantes do grupo municipal popular, presta aprobación á moción do grupo municipal do BNG, do teor literal seguinte:

*“Exposición de motivos*

*A violencia de xénero constitúe unha vulneración dos dereitos fundamentais das mulleres. É a manifestación máis clara e brutal da desigualdade aínda existente entre mulleres e homes na nosa sociedade, un indicador de que queda moito traballo para erradicar a discriminación e subordinación das mulleres e acadar unha sociedade igualitaria.*

*Nos últimos anos téñense dado pasos relevantes a nivel legal, superando unha visión que reducía o problema ao ámbito privado e asumindo que a loita contra a violencia de xénero é un problema de primeira orde e que na súa erradicación deben implicarse o conxunto de poderes públicos e a sociedade.*

*Na pasada lexislatura, en Galiza deuse un paso moi importante neste sentido coa aprobación dunha lei específica para a prevención e tratamento integral da violencia de xénero. Unha lei que, por primeira vez, fai un tratamento da violencia de xénero*

*desde unha perspectiva integral, recoñece dereitos para as mulleres que vivan unha situación de violencia no ámbito económico e social e articula toda unha serie de obrigas para as administracións públicas tanto no ámbito preventivo, como no formativo e na asistencia ás vítimas. Mais hai outro cambio relevante que introduce esta norma, a apertura dos recursos sociais a todas as mulleres con independencia de que contén cunha orde de protección ou non. Unha medida necesaria que vai na dirección de incrementar os resortes institucionais de apoio as mulleres. A aprobación desta lei supuxo paralelamente o incremento dos recursos destinados na Galiza a loita contra a violencia de xénero.*

*A Secretaría Xeral de Igualdade, cumprindo cun mandato establecido na lei, informou ao Parlamento Galego do grao de desenvolvemento das previsións contidas neste texto legal, así como daqueles aspectos que restaban poñer en marcha para completar o desenvolvemento da mesma, non obstante, o novo goberno da Xunta, non parece ter interese en por en funcionamento eses instrumentos lexislativos, considerando prescindíbeis e superfluas as accións tendentes á erradicación da violencia de xénero.*

*A Lei prevé a creación do Observatorio Galego da Violencia de Xénero, un órgano institucional da Xunta de Galiza que ten por obxecto encargarse do estudo, avaliación e seguimento das políticas de violencia de xénero. Unha medida importante a fin de contar con organismos e persoal especializado que permita facer unha análise sostida no tempo sobre a efectividade das medidas tomadas neste terreo e, consecuentemente, mellorar a eficacia das políticas e recursos que se dedican a esta finalidade. No informe elaborado a finais de 2008 pola Secretaría Xeral de Igualdade sobre o desenvolvemento da Lei 11/2007, consta a existencia dun borrador de decreto no que se estaba traballando a fin de poder cumprir con este mandato legal.*

*Xa o pasado 25 de novembro puñamos de manifesto esta cuestión noutra moción semellante, máis estes e outros aspectos do texto legal quedan aínda por desenvolver, así como outras medidas que é necesario que se continúen impulsando para que teñan eficacia, como son as relacionadas coa sensibilización social ou a formación de todas e todos os profesionais en ámbitos relacionados, directa ou indirectamente, contra a violencia de xénero. Un silencio que nos preocupa, pois a erradicación da violencia contra as mulleres debe ser unha prioridade de calquera goberno, que ten que materializarse na mobilización de recursos e no cumprimento das disposicións legais vixentes nesta materia.*

*Máis alá da parálise destes puntos, estase a producir ademais un desmantelamento das poucas estruturas básicas coas que a administración galega contaba neste ámbito, acabamos así, de asistir ao desmantelamento do Servizo Galego de Igualdade e unha redución económica e de medidas en xeral para a prevención da violencia de xénero.*

*Por todo isto, propoñémoslle ao Pleno da Corporación municipal a adopción do seguinte Acordo:*

*1. Instar á Xunta de Galiza a que realice unha planificación para a efectividade das previsións contidas na Lei 11/2007 que estaban pendentes de desenvolvemento; en concreto, a creación do Observatorio Galego da Violencia de Xénero e a posta en marcha do Centro de Recuperación Integral, realizar campañas periódicas de sensibilización contra a violencia de xénero, a formación da totalidade das e dos profesionais, e garantir o dereito á atención psicolóxica no ámbito sanitario público tamén recollido na lei.*

*2. Dar traslado deste acordo ao presidente da Xunta de Galiza, así como aos grupos parlamentarios do Parlamento de Galiza.*

### **c. Moción do grupo municipal socialista contra a violencia de xénero**

O señor alcalde don **Carlos A. Fernández Castro** lle da a palabra a concelleira do grupo municipal socialista dona **Isabel González Cancela** que di: A parte expositiva estivo en regra e tempo presentada e os grupos xa a coñecen, xa na comisión informativa e por iso vou a pasar a dar lectura aos acordos que presentamos a este Pleno:

Instar ao noso goberno autonómico para que promova a través dos medios públicos de comunicación programas específicos de sensibilización da sociedade contra a violencia de xénero ao fin de contribuír de maneira decisiva e erradicación desta terrible lacra.

Instar ao goberno central e ao noso goberno autonómico a realizar un estudo socio criminolóxico sobre violencia de xénero a fin de por de manifesto a realidade existente sobre esta terrible problemática proba da realidade existente na nosa sociedade.

Instar ao noso goberno autonómico a cumprir os acordos que sobre protección de menores expostos a medios de violencia de xénero foron asumidos polas comunidades autónomas na reunión do consello sectorial da igualdade celebrada en abril deste ano 2010 coa posta en marcha do sistema de protección especializada de menores e da elaboración do protocolo de atención aos nenos

Instar aos gobernos do estado, autonómico e locais para que inicien unha maior formación especializada e unha maior implicación das forzas e corpos de seguridade tanto nacionais, autonómicos e locais na protección das vítimas da violencia de xénero.

O último punto foi pedirlle a tódolos membros da Corporación Municipal de Ames, de forma simbólica usar a tarxeta vermella, o que fixemos ó principio do pleno.

Toma a palabra o señor alcalde don **Carlos Antonio Fernández Castro** que pregunta aos voceiros dos grupos municipais do BNG e popular se desexan intervir.

Non habendo ningunha intervención por parte dos voceiros, sometese a moción a votación.

Rematadas as intervencións o pleno da corporación, por unanimidade, presta aprobación á moción do grupo municipal socialista que é do teor literal seguinte:

#### *“Exposición de motivos*

*Dende o Partido Socialista Obreiro Español queremos facer un chamamento á rebelión colectiva da cidadanía contra a violencia de xénero. non podemos consentir que esta situación siga a manterse e debemos pór, todos e todas, o noso máis enérxico empeño en romper esta dinámica criminal, e protexer ás vítimas. A todas as vítimas.*

*Neste día, as mulleres e homes socialistas queremos mostrar o noso recoñecemento á coraxe e a valentía de tantas mulleres que, día a día, logran superar o medo e as barreiras – psicolóxicas, sociais, familiares, relixiosas...- erguidas ao longo de séculos de dominación machista, para rebelarse contra seu maltratador e levarlle ante a Xustiza.*

*Queremos denunciar a vergoñenta e criminal campaña emprendida por algunhas persoas (apoiadas por grupos e medios de comunicación ultraconservadores) que pretenden instalar na nosa sociedade a falsa idea de que moitas das denuncias de maltrato que se presentan son inventadas, cando os datos amosan todo o contrario.*

*En cambio, estamos no convencemento de que hoxe máis que nunca é necesaria a complicidade de todos os homes e mulleres deste país para loitar contra esta violencia. Porque o problema é de todos e non só das vítimas, sendo tamén de toda a sociedade o deber da denuncia. Se ante unha agresión volvemos o cabeza e calamos, estamos colaborando a crear espazos de impunidad para os agresores e a incrementar o sufrimento das vítimas, na súa maioría mulleres, pero tamén dos seus fillos e fillas.*

No que vai de ano, arredor de sesenta mulleres e catro nenos e nenas foron asasinados pola violencia machista. Calcúlase que, aproximadamente, 800.000 nenos e nenas sofren, no seu medio e con gran intensidade, a violencia de xénero. Estes menores necesitan unha protección especial e o apoio de toda a cidadanía para saír da espiral de violencia que sofren, sufriron ou sufrirán.

Sabemos que os nenos que medran nestes fogares padecen secuelas que poden durarlles toda a vida. Diminución do rendemento escolar, insomnio, pesadelos, fobias, ansiedade, agresividade..., son só algúns dos síntomas que presentan os e as menores que conviviron coa violencia de xénero. Ademais, o aprendizaxe de modelos violentos e roles de xénero erróneo poden conducirlos a repetir esas condutas, tanto no papel de vítima como de agresor, coa conseguinte reprodución da violencia de xénero.

A Lei Orgánica de Medidas de Protección Integral contra a Violencia de Xénero promovida polo actual goberno do Estado, non só protexe as mulleres, senón tamén a estas vítimas infantís da violencia de xénero.

O pasado mes de abril, o Goberno promoveu adicar un orzamento específico para a prevención e protección das vítimas infantís da violencia de xénero e elaborou un Protocolo de Actuación para as Comunidades Autónomas, que agora éstas deben pór en marcha de maneira urxente.

Pero non abonda coa protección institucional, por máis que esta exista e sexa cada vez maior, a denuncia é a única porta para pór en marcha todo o sistema de protección, tanto para as mulleres como para todo o seu medio. Este ano asistimos un triste escenario: a maioría das mulleres asasinadas non denunciaran aos seus maltratadores e, polo tanto, non puideran ser protexidas. O silencio é o mellor cómplice dos maltratadores porque lles proporciona a total impiedade e unha ampla liberdade para cometer os seus brutais actos. Por iso é tan importante a denuncia dos agresores.

Dende o Partido Socialista queremos facer un chamamento á conciencia de toda a cidadanía deste país para mobilizarnos contra os maltratadores, para que non encontren ningún resquicio de impiedade para os seus terribles actos.

Coa lealdade e corresponsabilidade de todas as Administracións, coa unidade de todas forzas políticas contra o maltrato asasino, co Poder Xudicial aplicando a Lei Orgánica de Medidas de Protección Integral contra a Violencia de Xénero e co esforzo e compromiso de todos conseguiremos erradicar a violencia de xénero.

Por todo o anteriormente exposto, o Grupo Municipal Socialista do Concello de Ames presenta os seguintes acordos, para a súa aprobación polo Pleno da Corporación:

- Instar ao noso Goberno Autonómico para que promova, a través dos medios públicos de comunicación, programas específicos de sensibilización da sociedade contra a violencia de xénero ao fin de contribuír de maneira decisiva á erradicación desta terrible lacra.
- Instar o Goberno Central e ao noso Goberno Autonómico, a realizar un estudo sociocriminolóxico sobre violencia de xénero a fin de pór de manifesto a realidade existente sobre esta terrible problemática, proba da realidade existente na nosa sociedade.
- Instar o Goberno Autonómico a cumprir os Acordos que, sobre protección de menores expostos a medios de violencia de xénero, foron asumidos polas Comunidades Autónomas na reunión do Consello Sectorial de Igualdade celebrada en abril deste ano 2010, coa posta en marcha do sistema de protección especializada de menores e de elaboración do Protocolo de atención aos mesmos.

- *Instar os Gobernos do Estado, Autonómico e Locais para conseguir unha maior formación especializada e unha maior implicación das forzas e corpos de seguridade tanto nacionais, autonómicas e locais na protección das vítimas de violencia de xénero.*
- *Pedirlle a todos os membros da Corporación Municipal de Ames para que, de forma simbólica amosen a súa “tarxeta vermella contra o maltrato”.*

Intervén o señor alcalde don **Carlos A. Fernández Castro** que di: Temos enriba da mesa, pola vía de urxencia, unha moción do grupo municipal popular.

En primeiro lugar teríamos que votar a favor ou non da urxencia, teríamos que considerar a urxencia da mesma, non sei se desexan xustificar a urxencia ou pasamos directamente a votación. O señor don **Bernardo Moar** responde: pasemos directamente a votación

Sometida a votación a urxencia, queda ratificada a mesma.

Chegadas as 24.00 horas do día 25 de novembro o señor alcalde presidente levantou a sesión, de todo o que eu como secretaria certifico.

Vº Prace

A secretaria

O alcalde